

Peqqussutissatut siunnersuummut oqaaseqaatit

Oqaaseqaatit nalinginnaasut**1. Aallaqqaasiut**

Peqqussutissap illuliortiternernut aningaasalersuineq pillugu Inatsisartut peqqussutaat nr. 4, 30. oktober 1998-imeersoq, Inatsisartut peqqussutaatigut nr. 1-ikkut, 21. maj 2002-meersukkut aamma Inatsisartut peqqussutaatigut nr. 5-ikkut, 15. april 2003-meersukkut allannguuteqartinneqartoq taarsissavaa.

Aalajangersakkanut maannamut atuuttunut naleqqiullugu najoqqutassatigut allannguisoqarpoq, tamatumalu nassatarisaanik inatsisitigut tunngavissanik allannguisoqarluni. Tamanna pingaartumik iluarsaassinissamut, pitsangorsaanissamut alliliinissamullu taarsigassarsinnaanermut, kiisalu piginnittut nikinneranni inatsisitigut inissisimanermut tunngassuteqarpoq.

Tamatumunnga peqatigitillugu annertussuseq tapiissuteqarfigineqarsinnaasooq 105 kvadratmeterimiit 110 kvadratmeterimut annertusineqarpoq, aammalu kvadratmeterimut tapiissuteqarfigineqarsinnaasumut akigititaasooq annertusineqarpoq, taamaalillunilu Naalakkersuisut kommunalbestyrelsillu taarsigassarsisitsinissaannut taarsigassarsiniartup inissiaq aningaasalersuiffigitinniarlugu qinnuteqarfigisaa 65 kvadratmeterit sinnerlugit imaluunniit inorlugit annertussuseqarnersoq maanna apeqqutaasussanngorluni.

Maleruagassat arlallit oqaasertaat erseqqissarneqarput aammalu maleruagassat inatsisitigut inissisimanernik allanngortitsiviunngitsumik ilusaasa aqqissuunnerat allannguuteqartinneqarlutik.

2. Peqqussutissatut siunnersuutip pingaarnersai

Peqqussutissatut siunnersuutip atuuffissai erseqqissarneqarput, taamaalilluni inatsisitigut piginnaatinneqartut tamarnik, tassalu inuinaat aamma inatsisitigut pisinnaatitaasut pisussaataasullu inissianik nutaanik sanaartornissamut aningaasalersuutissanik taarsigassarsinissamik qinnuteqarsinnaanerat, kiisalu inuinaat kisimik maanna inissiami najukkaminni iluarsaassinissamut, pitsangorsaanissamut alliliinissamullu aningaasalersuutissanik taarsigassarsinissamik qinnuteqarsinnaanerat erseqqissumik allassimalerluni.

Kapitali 2-mi, inissianik nutaanik aningaasalersuisarnermut tunngasumi pisortat taarsigassarsititsinerini annertussusissanut aningaasartaritinneqartussanullu killissarititaasut allanngortinneqarput. Annertussuseq

tapiissuteqarfigineqarsinnaasoq 105 kvadratmeterimiit 110 kvadratmeterimut annertusineqarpoq. Taassuma saniatigut aningaasanut killiliussaq 65 kvadratmeterinut siullernut sanaartornermut aningaasartuutinit tamakkiisunit annerpaamik kvadratmeterimut 15.500 koruuninut, aammalu 45 kvadratmeterinut tullernut, tassalu 66 kvadratmeteriniit 110 kvadratmeterit tikillugit 10.250 koruuninut annertussusilerneqarpoq. Peqqussummi atuuttumi aningaasanut killiliussaq 105 kvadratmeterinut siullernut 13.500 koruuninut annertussusiligaavoq. Siunnersuutip atuutilerneratigut taarsigassarsisup kvadratmeterinut siullernut akisunernullu aningaasaliiffigineqarnissaa qulakkeerneqarpoq. Naalakkersuisut kommunalbestyrelsillu taarsigassarsiarititassaasa annerpaaffissaat annertunerusumik allangortinneqanngillat.

Nutaatut inissianut nutaanut aningaasalersuutissanik pisortanit taarsigassarsiarititassat piginnittut nikinneranni akiligassanngortinneqartarunnaarput.

Maanna iluarsaassinermut pitsanngorsaanermullu taamaallaat inissianik pioreersunik, piffissamit qinnuteqarfiusumit ukiut 20-it qaangiutsinnagit sananeqarsimasunik, aammalu 95 kvadratmeterit sinnernagit annertussuseqartunik piginnittunut taarsigassarsititsisoqarsinnaalerpoq. Pisoqaassutsimut kvadratmeterinullu killiliinermi siunertaavoq taarsigassarsiassarititaasut illunut minnerusunut pisoqaanerusunullu, iluarsaanneqarnissamik pitsanngorsarneqarnissamillu pisariaqartitsisunut atugassatut siunniunneqarnissaat.

Kiisalu peqqussutissatut siunnersuut Naalakkersuisut inissianik pioreersunik alliliinissamut taarsigassarsititsisinnaanerinut inatsisitigut tunngavissamik nutaamik imaqarpoq. Tassani piumasarineqarpoq inissiap piffissamit qinnuteqarfiusumit ukiunit 20-nit siusinnerusukkut sananeqarsimanissaa, aammalu allilerneqannginnermini 95 kvadratmeterit sinnernagit annertussuseqarnissaa, alliliinerullu kingorna 110 kvadratmeterit sinnerlugit annertussuseqalinnginnissaa. Pisoqaassutsimut kvadratmeterinillu killiliinermi siunertaavoq taarsigassarsiassarititaasut illunut minnerusunut pisoqaanerusunullu, allilerneqarnissamik pisariaqartitsiviusunut atugassatut siunniunneqarnissaat.

Siunnersuutip kapitaliani 4-mi aalajangersakkamik nutaamik ikkussisoqarpoq, taamaalillunilu inissiat taarsigassarsititsiviusut sukkulluunniit minnerpaamik ikuallattoornissamut anorersuarneranilu ajoqusernissamut sukkulluunniit sillimmaserneqarsimasussaangortinneqarlutik.

Kiisalu siunnersuutip kapitaliani 5-imi Naalakkersuisut kommunalbestyrelsillu taarsigassarsiniarluni qinnuteqaatit suliarinerinut, kiisalu qularnaveeqqusiissuteqarluni taarsigassarsinermut allakkiap atsiorneqarneranut atatillugu suliarinninnermut atatillugu akitsuummik akiliisitsiniarsinnaanerannut inatsisitigut tunngavissamik ikkussisoqarpoq.

3. Pisortanut aningaasaqarnikkut allaffissornikkullu sunniutissat

Peqqussutissatut siunnersuutip pisortanut aningaasaqarnikkut sunniuteqarnissaa naatsorsuutigineqarpoq, nutaatut Naalakkersuisut kommunalbestyrelsilu

taarsigassarsianut aningaasalersuinnermut atatillugu suliarinninnermut akitsuunik akiliisitsisinnaalermata. Kiisalu Naalakkersuisut kommunalbestyrelsilu piginnittut nikinnerannut, taarsigassarsiallip taarsigassarsiaanik allannortitsinnermut, kingornussassat suliarineqarnerinut aammalu qularnaveeqqusiussaqaarluni taarsigassarsinnermut allakkiaq tunngavigalugu akiliisitsiniarnermut atatillugu akitsuunik akiliisitsisinnaalissapput.

Peqqussutissatut siunnersuutip pisortanut allaffissornikkut sunniuteqarnissaa naatsorsuutigineqanngilaq.

4. Inuussutissarsiornermut aningaasaqarnikkut allaffissornikkullu sunniutissat

Peqqussutissatut siunnersuutip inuussutissarsiornermut aningaasaqarnikkut imaluunniit allaffissornikkut sunniuteqarnissaa naatsorsuutigineqanngilaq.

5. Innuttaasunut aningaasaqarnikkut allaffissornikkullu sunniutissat

Peqqussutissatut siunnersuut innuttaasunut aningaasaqarnikkut sunniuteqarsinnaavoq, tassani taarsigassarsiasianut killissarititaasut allannortinneqarmata. Innuttaasut inissianik 110 kvadratmeterit inorlugit angissusilinnut aningaasalersuiniartut peqqussutissatut siunnersuutip atuutilerneratigut peqqussummut maanna atuuttumut sanilliullugu pisortanit annertunerusunik taarsigassarsisinnaalissapput, kiisalu innuttaasut inissianik 110 kvadratmeterinik taakkunangaluunniit annertunerusunik sananiartut pisortanit taarsigassarsinnermini maanna peqqussut atuuttoq malillugu killiliussat annertoqqataannik taarsigassarsisinnaalissallutik.

Nutaatut Naalakkersuisut kommunalbestyrelsilu taarsigassarsiniarluni qinnuteqaatip suliarineqarneranut taarsigassarsiniartup akiliisinneqarnissaa piumasarisinnaalerpaat. Kiisalu Naalakkersuisut kommunalbestyrelsilu piginnittut nikinnerannut, taarsigassarsisimasup taarsigassarsiaanik allannuinissamut, kingornussassanik suliaqarnermut aamma qularnaveeqqusiussaqaarluni taarsigassarsinnermut allagartap atsiortneranut atatillugu suliat suliarinerannut akiliisitsinissamik piunasaqarsinnaapput.

Peqqussutissatut siunnersuutip innuttaasunut allaffissornikkut sunniuteqarnissaa naatsorsuutigineqanngilaq.

6. Avatangiisinut pinngortitamullu sunniutissat

Peqqussutissatut siunnersuutip avatangiisinut imaluunniit pinngortitamut sunniuteqarnissaa naatsorsuutigineqanngilaq.

7. Sunniutaasinnaasut annertuut allat

Peqqussutissatut siunnersuutip allanik annertuunik sunniuteqarnissaa naatsorsuutigineqanngilaq.

8. Naalagaaffeqatigiinnermut namminersulernissamullu tunngasut

Peqqussutissatut siunnersuutip Naalagaaffeqatigiinnermut imaluunniit namminersulerniarluni suliati ingerlanerannut sunniuteqarnissaa naatsorsuutigineqanngilaq.

9. Oqartussaasunut suliniaqatigiinnullu il.il. tusarniaaneq

Peqqussutissatut siunnersuut ukununga tusarniaassutigineqarpoq: A/S Inissiaatileqatigiiffik INI, KANUKOKA, Iserit A/S, Aningaasaqarnermut Pisorta qarfik, SIK, Sulisitsisut Peqatigiiffiat, Ilik, Nusuka, PPK, PIP, AK, IMAK, ASG, Grønlandsbanken, Sparbank Vest, Ejendomskontoret Igdlø kiisalu Grønlands Ejendoms kontor.

Tusarniaanermi A/S Inissiaatileqatigiiffik INI, KANUKOKA, Aningaasaqarnermut Pisorta qarfik, SIK, Sulisitsisut Peqatigiiffiat, Ilik, Nusuka, PPK, AK, IMAK aamma Grønlandsbanken akissuteqarput.

Tusarniaanermi akissutit, teknikkikkut kukkunernik kiisalu oqaatsitigut kukkunernik amigaatinillu imaqartut annertunerusumik oqaaseqarfigineqaratik siunnersuummut ilanngunneqarput.

Tusarniaanermi akissutit allat, siunnersuutip imaanut tunngassuteqartut annertunersaat matuma kinguliani issuarneqarlutik oqaaseqarfigineqarput. Ineqarnermut Attaveqarnermullu Pisorta qarfiup tusarniaanermi akissuteqaatit siunnersuummi tulleriiarineq malillugu oqaaseqaateqarfigineqarnissaat naleqqunnerpaatissimavaa.

Siunnersuut ataatsimut isigalugu

Nusuka-mit oqaatigineqarpoq, peqqussutissaq ajornanngippat naalagaaffiup aningaasaleeqataaffiginngisaannut tunngassuteqartut Inatsisartut inatsisaattut qaffanneqartariaqaraluartut. Tamatumunnga tunngatillugu oqaatigineqassaaq, Inatsisartut inatsisaasa aamma Inatsisartut peqqussutaasa assigiinngissutaannut pingaartumik Namminersornerullutik Oqartussat suliassa qarfimmik danskit naalagaaffiannit tapiiffigineqarlutik imaluunniit tapiiffigineqaratik tiguisisimanersut tunngavigineqarmat, tak. Namminersornerullutik Oqartussat pillugit inatsit nr. 577, 29. november 1978-imeersoq. Namminersornerullutik Oqartussat inissianik pilersuineq, inissialiortiternermut tapersiissuteqartarnej, inissianik attartortitsisarnej il.il. pillugit inatsit nr. 944, 23. december 1986-imeersoq tunngavigalugu ineqarnej pillugu suliassa qarfik tapiissutitalimmik tiguaat, taamaattumillu suliassa qarfik taanna inatsisartut inatsisaannik aalajangersaaffigineqarani peqqussutit atorlugit inatsisiliuunneqarsimalluni.

Siunnersuummi § 1, imm. 2-mut

SIK-miit "inuussutissarsiutit minnerusut namminersorfiusut" suunersut ersarissumik nassuiaasioqquneqarput. Oqaaseqaatit tamanna tunngavigalugu erseqqissarneqarput.

Siunnersuummi § 4, imm. 3-mut (siunnersuummi tusarniaassutigineqartumi § 3, imm. 2)

KANUKOKA-miit siunnersuummi § 3, imm. 2-mi allannguut, inissiat annertussusaasa kvadratmeterimullu tapiissutit annerpaaffilerneqarneranut tunngasoq akuersaarneqarpoq, kisiannili taarsigassarsiat aningaasat nalingisa appartarnerannut/qaffattarnerannut iluarsisarnissaq amigaatigineqarpoq.

Naalackersuisoqarfimmit aningaasat nalingisa appartarnerannut/qaffattarnerannut ingerlaavartumik iluarsisarnissaq kissaatigineqanngilaq. Taarsigassarsiasannut killissarititaasut taaneqartut peqqussutikkut aalajangersagaapput, taamaattumillu Inatsisartut peqqussutaannut allannguutissamik peqqussusiornikkut aatsaat allanngortinneqarsinnaallutik.

Siunnersuummi § 6, imm. 3-mut (siunnersuummi tusarniaassutigineqartumi § 5, imm. 3)

KANUKOKA isumaqarpoq, taarsigassarsiniarluni qinnuteqartup nammineerluni sulinera inissiap sananeqarneranut aningaasartuutaasunut tamakkiisunut ilaasariaqartoq, taamaalilluni innuttaasunit amerlanerusut inissiamik namminerisaminnik pisisinnaanissamut periarfissinneqassammata.

Ineqarnermut Attaveqarnermullu Naalackersuisoqarfimmiut KANUKOKA-mit isummersuutaasut paasilluarneqarsinnaapput, kisiannili taarsigassarsiniarluni qinnuteqartup nammineerluni sulinera sanasutut illersorsinnaasumik suliarineqarsimanersoq nalileruminaatsinneqarpoq, taamaattumillu taarsigassarsiniarluni qinnuteqartup nammineerluni sulinera qanoq iliorluni, tamannalu pissappat qanoq nalilerlugu sanaartornermut aningaasartuutitut ilanngunneqarnissaa aqukkuminaatsinneqarluni. Taamaattumik taarsigassarsiniarluni qinnuteqartup nammineerluni sulinerata nalingata sanaartornermut aningaasartuutitut tamakkiisunut ilanngunneqannginnissaa aalajangiusimaannarneqarpoq.

Siunnersuummi § 8, imm. 1-imut (siunnersuummi tusarniaassutigineqartumi § 7, imm. 1)

KANUKOKA isumaqarpoq, pisortat taarsigassarsiarititaat piginnittut nikinneranni akiligassanngortinneqartariaqanngitsut.

Ineqarnermut Attaveqarnermullu Naalackersuisoqarfimmiit siunissami inissiat tunineqartarnissaat eqqarsaatigalugu aalajangersagassatut siunnersutigineqartoq isumaqatigineqarpoq.

Aalajangersagaq peerneqarpoq (siunnersuummi tusarniaassutigineqartumi § 7, imm. 4)

KANUKOKA isumaqarpoq siunnersuummi § 7, imm. 4 siunnersuummi § 7, imm. 1-imut akerliusoq, pisortanit taarsigassarsiarititat akiligassanngortinneqaratik

piginnittut nikittarnissaasa, tak. imm. 1, aamma Naalakkersuisut kommunalbestyrelsilu piginnittut nikinnerannik akuersisarnissaasa, tak. imm. 4, akornanni naapertuutinngitsoqarmat. Aalajangersakkani imm. 4-mi akuersisarnissamat piumasagaat peerneqarpoq, taamaalilluni siunnersuummi § 7 ataqatigiissutut isikkoqalerluni.

Siunnersuummi § 9, nr. 2-mut

Piumasagaat atuutilernermini qanoq aquneqassanersoq SIK-mit paaserusunneqarpoq. Oqaaseqaatini tamanna pillugu nassuiaasoqarpoq.

Siunnersuummi § 11-mut

KANUKOKA-miit inissiamik piginnittup inissiamik najukkaminik sananermi kingorna aatsaat ukiut 20-t qaangiunnerini inissiamik iluarsaassinissamat, pitsanngorsaanissamat alliliinissamullu taarsigassarsinnaanera paasiuminaatsinneqarpoq, maanna inissiat pigineqartut pitsaanerpaamik aserfallatsaaliorneqarnissaat inuiaqatigiit soqutigisarissammassuk. Inissiat pitsaanerpaamik aserfallatsaaliortariaqarmata, tamanna pillugu Naalakkersuisut KANUKOKA isumaqatigaat, kisiannili inissiat namminerisamik pigineqarput, taamaattumillu tunngaviumik inissianik piginnittut ataasiakkaat inissianik pigisaminnik aserfallatsaaliuineq isumagisariaqarpat. Kisiannili pingaartumik inissianik sanaartornermut tapersiissuteqartarnek naapertorlugu illuliat pisoqqat siunissamissaq piuvinnassagunik iluarsisarialinnik amigaateqarput, taamaattumillu inissiat pisoqqat taakku iluarsaannissaannut pitsanngorsarnissaannullu taamaallaat taarsigassarsisitsisoqartartussaavoq.

Siunnersuummi § 11, imm. 2-mut (siunnersuummi tusarniaassutigineqartumi § 12, imm. 2)

SIK-miit aalajangersakkamat tamakkiinerusumik oqaasertaliinissaq kissaatigineqarpoq, taamaaliornikkut suliat assigiiaarnerusumik suliarineqartarnissaat qulakkeerneqartussaammat. Kissaatigineqartoq malinneqarpoq. Tamatumunnga peqatigitillugu Naalakkersuisut kisimik suliassanik aalajangersimasunik suliaqartarnissaat erseqqissaatigineqarpoq, taamaalillunilu assigiinngiaartumik suliaqartarnissap ilimagineqarsinnaanera annikillisinneqarluni.

Siunnersuummi § 12-imut (siunnersuummi tusarniaassutigineqartumi § 13)

SIK-miit alliliinissamat qinnuteqaatit aamma nutaanik sanaartornissamat qinnuteqaatit alliliinermi inissiap qanoq annertutigilersinnaaneranut killiliinikkut assigiinngitsunik suliarineqartarnissaat naleqqutinngitsutut isumaqarfigineqarpoq, nutaanik sanaartornissamat atatillugu killiliussaqaq allaanerummat. Naalakkersuisut assigiinngissutaasumut tunngavilersuutitut oqaatigaat, inissiaq sananeqareersimasoq tunngavimmigut namminerisamik inissiatigineqartartoq, taamaattumillu piginnittup inissiamut aningaasartuutissanik tamaginnik isumagisaqarnissaa naatsorsuutigineqarluni. Taamaattorli Naalakkersuisut ilisimaaraat, pingaartumik BSU-mit taarsigassarsilluni illuliat pisoqaanerusut ullumikkut pitsaassuserititassanut

naleqqiullugu mikivallaartartut, taamaattumillu BSU-mit taarsigassarsilluni illulianik mikisunik pisoqaanerusunik piginnittunut, 110 kvadratmeterit tikillugit annikitsunik alliliinissamik kissaatigisaqartunut taarsigassarsitsisoqartassasoq. BSU-mit taarsigassarsilluni illuutillit allat, annertunerusumik alliliinissamik kissaateqartut inissiamik namminerisamik piginnittut alliliissutissatut kissaatigisaminnut namminnerlutik aningaasalersuisarnissaat naatsorsuutigineqarpoq.

Siunnersuummi § 13-imut (siunnersuummi tusarniaassutigineqartumi § 14)

KANUKOKA-mit aamma GA-mit inissiani pioreersuni iluarsaassinissamut, pitsanngorsaanissamut alliliinissamullu tunngavimmigut piginnittut nikinneranni akiligassanngortinneqartarnissaat paasiuminaatsinneqarpoq, tamanna inissianik nutaanik aningaasalersuinissamut taarsigassarsianut tunngaviusumik atorneqartussaangimmat. Tamatumunnga assigiinngissutaasumut tunngavilersuutigineqarpoq, inissianik nutaanik aningaasalersuinissamut taarsigassarsiat ukiuni 20-ni erniaqartinneqaratillu akilersugassaangimmata, tamatumalu kingorna taarsigassarsiat ukiuni tulliuttuni 15-ini akilersugassaallutik, kiisalu inissianik pioreersunik iluarsaassinissamut, pitsanngorsaanissamut alliliinissamullu taarsigassarsiat assersuutigalugu piginnittut nikinnissaasa tungaanut erniaqartinneqaratillu akilersugassaangimmata, tamatumalu kingorna taarsigassarsiat tamakkiisumik akiligassanngortinneqartussaammata.

Siunnersuummi § 15-imut (siunnersuummi tusarniaassutigineqartumi § 17)

Piumasaqaat atuutilernermini qanoq aquneqassanersoq SIK-mit paaserusunneqarpoq. Oqaaseqaatini tamanna pillugu nassuiaasoqarpoq.

Siunnersuummi § 18-imut (siunnersuummi tusarniaassutigineqartumi § 20)

SIK-mit suliassamik suliarinninnermut akitsuut taarsigassarsinissamik qinnuteqaammik suliaqarnermut atatillugu allaffissornermut aningaasartuuterpianut naapertuunnersoq paaserusunneqarpoq. Oqaaseqaatini tamanna pillugu nassuiaasoqarpoq.

Siunnersuummi § 20, imm. 3-mut (siunnersuummi tusarniaassutigineqartumi § 21, stk. 3)

SIK-miit maleruagassat ataatsit malillugit Naalakkersuisut kommunalbestyrelsillu suliamik suliarinninnerat neriorsuuteqarnermik itigartitsinermillu assigiinngitsunik inernejarsinnaanerat qanoq ililluni pisinnaanersoq eqqumiiginartinneqarpoq. Aalajangersakkami oqaaseqaatit erseqqissarneqarput, taamaalillunilu maanna Naalakkersuisut kommunalbestyrelsillu taarsigassarsititsisoqassanersoq aalajangiisussanngortillutik tunngavissat suut pingaartissaneraat ersarissumik allassimalerpoq. Kiisalu allaffisornikkut suleriaatsit assigiinngitsut assigiinngitsunik inernejarsinnaapput, tamatumani maleruagassat ataatsit aallaavigalugit sulineq ingerlagaluarpuunniit.

Siunnersuummi § 24-mut (siunnersuummi tusarniaassutigineqartumi § 25)

GA-miit § 25-imi atorunnaarsitsinissamut aalajangersakkamik, inissianik aningaasalersuisarneq pillugu Inatsisartut peqqussutaannik kingusinnerusukkut allannguuteqartinneqartumik atuuttumik atorunnaarsitsissutaasussamik amigaateqartoqarnera tikkuarneqarpoq. Tamanna naapertorlugu aalajangersakkamik atorunnaarsitsissutaasussamik ilanngussisoqarpoq.

Peqqussutissatut siunnersuummi aalajangersakkanut ataasiakkaanut oqaaseqaatit

§ 1-imut

Imm. 1 Inatsisartut peqqussutaanni nr. 4-mi, 30. oktober 1998-imeersumi § 1 oqaasertamigut allannguuteqartinneqarluni § 1-ip assigaa, kiisalu imm. 2 nutaajulluni.

Imm. 1-imut

Nr. 1-ip atuutilerneratigut Naalakkersuisut kommunalbestyrelsilu inatsisitigut piginnaatitaasunut tamanut taarsigassarsititsisinnaapput, tassalu inuinnarnut taamatullu inatsisitigut pisinnaatitaasunut pisussaatitaasunullu, tamakkiisumik ilaannaasumilluunniit naalagaaffimmit, Namminersornerullutik Oqartussanit, kommunimit ataatsimit imaluunniit kommunit kattuffiannit, kommunalbestyrelsit aamma nunaqarfinni aqutsisut il.il. pillugit Inatsisartut peqqussutaanni § 64-imi taaneqartunut, aktiaatileqatigiiffinnit, anpartsselskabinit piginneqatigiiffinnit assigisaannillu pigineqartunut. Inissiat ilaqutariinnut arlalinnut inissiatut, inissiatut uiguleriittut, inissiatut uigulukuttut, ilaqutariinnut ataatsinut illutut illutullu affarleriittut sananeqarsinnaapput, aammalu assersuutigalugu nammineq inigisatut, inissiatut attartortittakkatut imaluunniit sulisunut inissiatut atorneqarsinnaallutik.

Tamatuma saniatigut siunnersuummi kapitali 3-mi maleruagassat malillugit inissiani nammineq pigisani qanorluunniit ittuni iluarsaassinissamut, pitsanngorsaannissamut alliliinissamullu inuinnarnut taarsigassarsitsisoqarsinnaavoq, tassalu ilaqutariinnut ataatsinut illuni illunilu affarleriinni, inissiani uiguleriinni, inissiani uigulukuttuni aamma ilaqutariinnut arlalinnut inissiani, tak. nr. 2. Iluarsaassineq tassaavoq inissiami atortulersuutinik imaluunniit inissiap ilaanik pioreersunik taarsersuineq iluarsaassinerluunniit. Pitsanngorsaaneq tassaavoq inissiami nutaanik atortulersuusersuineq inissialluunniit ilaanik ikkussuineq.

Aalajangersakkami qinnuteqartumut piumasaqaatit marluk saqqummiunneqarput, ilaatigut qinnuteqartoq inuinnaassalluni inissiamik piginnittoq, ilaatigullu qinnuteqartup inissiaq taarsigassarsinissamik qinnuteqarfiusoq piffissami pineqartumi najugaqarfigissallugu.

Imm. 2-mut

Imm. 2-p atuutilerneratigut inissianik inuussutissarsiutinik ingerlataqarfiusunik imaluunniit ingerlataqarfiulersussanik sananissamut, iluarsaassinissamut, pitsannngorsaanissamut alliliinissamullu taarsigassarsititsisoqarsinnaassanngilaq. Inuussutissarsiutinik oqarnermi isumagineqartoq tassaavoq inissiaq inuussutissarsiummik ingerlataqarnermut atorneqartoq. Taamaattumik inissiaq tamakkiisumik ilaannaasumilluunniit inuussutissarsiummik ingerlataqarnermut atorneqarpat taarsigassarsititsinissamut itigartitsisoqassaaq. Taamaattorli inissiamit najukkamit inuussutissarsiutinik annikinnerusunik namminersorfiusunullu ingerlataqarneq akuerineqarsinnaavoq, inissiaq pingaartumik najugarisatut atorneqarpat. Tikeraanut angerlarsimaffiit imaluunniit tikeraanut ineeqqat, motelit, cabinit, akunnittarfiit assigisaallu najugarisat ataanni inissisimangillat.

Naalackersuisut kommunalbestyrelsilu pisuni tamaginni inissiaq pingaartumik najugarisatut atorneqarnerseq naliliisassapput. Najoqqutarineqartartut malillugit inissiami inimit ataatsimit amerlanerunngitsoq inuussutissarsiummik namminersorfiusumik aaqqissuussisoqarsinnaavoq, soorlu ineeraq ataaseq nutserinermut atorneqarsinnaalluni. Ataatsimut isigalugu inissiap inuussutissarsiutinut annikinnerusunut namminersorfiusunullu atorneqarfigisaa annikitsuinnaassaaq. Inuussutissarsiuutinut annikinnerusunut namminersorfiusunullu assersuutitut taaneqarsinnaapput kukkunersuuisoqarfiit pilerisaarusiortarfiillu annikitsut, pingaartumik illup avataanut sullitanik attaveqarfiusartut, namminersorluni meeqqanik ulluunerani paaqqinnittarfeqarneq imaluunniit isikkanik passussisarfeqarneq.

§ 2-mut

Aalajangersakkap najoqqutassatigut annikitsunik ikittunik allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 3 assingaa. Naalackersuisut kommunalbestyrelsilu inissianik sananissamut, iluarsaassinissamut pitsannngorsaanissamut alliliinissamullu taarsigassarsititsisinnaanngillat, sanaartugassaq sanaartornermut pilerisaarusiornermullu inatsisinut naapertuutinngippat. Tamatumani pingaartumik taarsigassarsisup illuliornermut malittarisassanik aamma nunaminertanik atuineq pilerisaarusiornerlu pillugit Inatsisartut peqqussutaannik malinninnissaa eqqarsaatigineqarpoq.

§ 3-mut

Aalajangersakkap najoqqutassatigut allannguuteqartinneqarluni, oqaatsitigullu erseqqissaavigineqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 7, imm. 2 assingaa.

Aalajangersakkakut qulakkearniarneqarpoq Naalackersuisut kommunalbestyrelsillu sanaartugassamut taarsigassarsititsisoqassanersooq pillugu suliamik suliarinninnerisa suliamullu aalajangiinissaasa sanaartorerup aallartinnginnerani naammassineqarnissaa. Taamaalilluni aalajangersakkap atuutilerneratigut

Naalackersuisut kommunalbestyrelsilu sanaartukkanut aallartereersunut imaluunniit naammassineqareersunut taarsigassarsinissamik qinnuteqaatinut itigartitsisalissapput.

Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 7, imm. 1 ingerlateqqinneqanngilaq, aalajangersagaq pisariaqartinneqanngimmat. Siunnersuummi § 20, imm. 3-mi allassimareerpoq, Naalackersuisut kommunalbestyrelsilu paasisutissatut nassiussat tunngavigalugit qinnuteqaammut isummertassasut.

§ 4-mut

Aalajangersakkami Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 2, imm. 1 aamma 2, aammalu § 4 ataatsimut allanneqarput, tassanilu inissianik aningaasalersuisarnermi aaqqissuussinnermut qitiusumik tunngavissarititaasut killissarititaasullu nassuiarneqarput. Aalajangersakkap atuutilerneratigut siornatigut inatsisitigut inissisimanermit naleqqiullugu najoqqutassanik arlalinnik allannguisoqarpoq.

Aalajangersakkami allassimavoq pisortat inissianik nutaanik sanaartornermut aningaasalersuutissatut annertussutsimut tapiiffiqineqarsinnaatitaasumut sanaartornermut aningaasartuutit tamakkiisut 40%-iat tikillugu taarsigassarsititsisinnaasut. Qinnuteqartup nammineerluni sanaartornermut aningaasartuutinit sinneruttut nammineerluni aningaasalersussavai, soorlu aningaaserivimmit taarsigassarsinermigut, realkredittimit taarsigassarsinermigut aningaasalersuisinnaasunilluunniit allanit taarsigassarsinermigut.

Imm. 1-imut

Imm. 1 ilaatigut nutaajuvoq, ilaatigullu Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 4, imm. 1-imik aamma 2-mik ataatsimoortitsiviulluni. Tassani Naalackersuisut kommunalbestyrelsillu inissianik nutaanik aningaasalersuinissamut taarsigassarsiarititaasa pineqarnerat erseqqissarneqarpoq.

Nutaatut imm. 2-mi 3-milu annertussusissamut aningaasartarititassanullu killissatut aalajangersarneqartut iluanni pisortat taarsigassarsiarititaat sanaartornermut aningaasartuutit tamakkiisut 40 procentiinik annertussuseqartut tunngavigalugit Naalackersuisut kommunalbestyrelsilu tamarmik immikkut 20 procentinik taarsigassarsititsisinnaalerput. Taarsigassarsiniarluni qinnuteqartup Naalackersuisunit aamma kommunalbestyrelsimit ataatsikkut taarsigassarsinissamik neriorsuuteqarfigineqarnissaa piunasaqaataanngilaq. Taarsigassarsiniarluni qinnuteqartoq Naalackersuisunit kommunalbestyrelsimitilluunniit taarsigassarsinissamik neriorsuuteqarfigineqarnissaminut itigartinneqarpat, taarsigassarsiniarluni qinnuteqartup nammineerluni sanaartornermut aningaasartuutit taakkununga tunngasortai ilanngullugit akilissavai.

Naalackersuisut kommunalbestyrelsilluunniit illuatungiliuttoq aningaasaliissutissat affaannik aningaasaliisinnaatinnagu tamarmik immikkoorlutik pisortanit taarsigassarsiarititassat tamakkerlugit akilersinnaajunnaarpaat. Maannamut periarfissaasimasoq taanna, Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 4, imm. 2-mi maleruagassiorneqarsimagaluartoq peqqussummi matumani peerneqarpoq, periarfissaq taanna suliat ingerlanneqarneranni atorneqanngisaannarsimammat.

Sanaartornermut aningaasartuutit tamakkiisut sunik imaqarnissaannik sukumiisumik killiliinerit pillugit siunnersuummi § 6, imm. 2-mut oqaaseqaatit innersuunneqarput.

Imm. 2-mut

Imm. 2 nutaajuvoq, aammalu annertussutsinut allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 2, imm. 1-imut assingusuulluni.

Imm. 2-mi Naalackersuisut kommunalbestyrelsillu taarsigassarsiarititassaannut annertussutsinut killiliussat aalajangersarneqarput. Annertussutsimut taarsigassarsititsiviusinnaasumut annerpaaffissaq 105-imiit 110 kvadratmeterimut qaffanneqarpoq.

Imm. 3-mut

Imm. 3 nutaajuvoq aammalu aningaasat annertussusissaat allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 2, imm. 1-imut annertunerusutigut assingusuulluni.

Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi annertussusissamut aningaasartaliussassanullu killiliussat 105 kvadratmeterimut aamma kvadratmeterimut 13.500 koruuninut aalajangersarneqarsimapput, tamatumalu nassatarisaanik Naalackersuisut kommunalbestyrelsillu taarsigassarsiarititaat annerpaamik 283.500 koruuninik (= (13.500 kr. X 105 kvadratmeterit) 20 procentii) amerlassuseqarsinnaallutik.

Siunnersuummi 65 kvadratmeterinut siullernut aningaasaliissutissanut killiliussat 15.500 koruuniupput, 45 kvadratmeterinullu tulliuuttunut, tassalu 66 kvadratmeterimiit 110 kvadratmeterit tikillugit aningaasaliissutissanut killiliussat 10.250 koruuninut aalajangersarneqarlutik. Killiliussat nutaat tamakkerlutik nassatarisaanik Naalackersuisut kommunalbestyrelsillu taarsigassarsiarititaat 293.750 koruuninik (= 20 procent af (15.500 koruunit x 65 kvadratmeter)-it + (10.250 koruunit x 45 kvadratmeter)-it 20 procentiinik) annertussuseqarsinnaapput.

Taamaalilluni Naalackersuisunit kommunalbestyrelsimillu taarsigassarsiaritinneqarsinnaasut annerpaaffissaat annertunerusutigut pigiinnarneqarpoq, kiisalu taarsigassarsiarititaasut katitigaanerat

allannguuteqartinneqarluni. Peqqussut atuuttoq naapertorlugu Naalakkersuisunit kommunalbestyrelsimillu 65 kvadratmeterinut siullernut taarsigassarsiarititaasut kvadratmeterimut 2000 koruuninik amerlanerusut taarsigassarsiaritinneqartalissapput, kiisalu 45 kvadratmeterinut tullernut taarsigassarsiarititaasut kvadratmeterimut 3.250 koruuninik ikinnerusut taarsigassarsiaritinneqartalissallutik. Tamatumani siunertaavoq inissiat minnerusut, amerlanertigut inissianut annerusunut naleqqiullutik kvadratmeterimut akisunerusartut aningaasalersorneqarsinnaanissaat.

Imm. 4-mut

Imm. 4 najoqqutassatigut allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 2, imm. 2-p aamma § 4, imm. 3-p aamma 4-p assingaat. Aalajangersagaq malillugu pisortanit taarsigassarsinissamut taarsigassarsisup sanaartornermut aningaasartuutit tamakkiisut sinnerinik nammineerluni aningaasalersuinissaa piunasaqaatigineqarpoq. Imm. 4 tunngavigalugu taarsigassarsisoq 110 kvadratmeterinut anginerusumik aammalu 65 kvadratmeterinut siullernut 15.500 koruuninut akisunerusumik, kiisalu 45 kvadratmeterinut tulliuttunut 10.250 koruuninut akisunerusumik sanasinnaavoq, taarsigassarsisoq taarsigassarsiarineqarsinnaatitaasut saniatigut aningaasartuutinik tamakkiisunik aningaasaliisinnaaguni.

§ 5-imut

Aalajangersagaq nutaajuvoq, tassanilu inissiani ataasiakkaani inissiap annertussusaata qanoq iliorluni naatsorsorneqarnissaa aalajangersarneqarpoq. Inissiap annertussusaa pisortat taarsigassarsiarititassaasa naatsorsornerinut tunngavigineqartussat ilagaat, taamaattumillu inissiat tamarmik annertussutsimikkut naatsorsorneqarnerminni assigiimmik uuttorneqartarnissaat pingaaruteqarpoq.

Imm. 1-imut

Aalajangersakkami inissiap annertussusaata tamakkiisup qanoq iliorluni naatsorsorneqarnissaa aalajangersarneqarpoq. Suliffeqarfik namminersortoq ilaqutariinnut arlalinnut inissiamik arfinilinnik initalimmik sananissamut taarsigassarsinissamik soorlu Naalakkersuisunut kommunalbestyrelsimillu qinnuteqarpat, inissianillu taakkunannga pingasut 100 kvadratmeterinik annertussuseqassappata pingasullu 140 kvadratmeterinik annertussuseqassallutik, pisortat taarsigassarsiarititassaasa annertussusissaat ininut ataasiakkaanut agguarlugu naatsorsorneqassaaq.

Pequusivik, biilinit oqquisitsisarfik, aneerasaartarfik biililluunniit unittarfiat qulisaq teknikkimut tunngasortaata eqqarsaatigalugit najugassatut oqorsarlugit atorineqarsinnaappata, kisiannili nunaminertamik tunineqarsinnaannginneq imaluunniit pissutsit pilersaarusiormut inatsisinik uniuippata pequusivik, biilinit oqquisitsisarfik, aneerasaartarfik biililluunniit unittarfiat qulisaq najugassatut

naatsorsuinermi ilanngunneqassanngillat, taamatut najugassamik ilanngussineq nunaminertanut pilersaarusiornermullu inatsisinik uniuinerussammat.

Imm. 2-mut

Aalajangersagaq inissiap naqqup ataani, inini quleriinni nalinginnaasumik atugaasumi aammalu qaliani init annertussusaannik qanoq iliorluni naatsorsuisinnaanerup teknikkimut tunnganerusortaanik imaqarpoq.

Imm. 3-mut

Aalajangersakkap atuutilerneratigut naqqup ataani qalianilu init najukkatut naatsorsuinermit ilaatinneqarsinnaapput, taakku inigisatut iluarsaanneqarsimappata, tassalu oqorsarneqarsimappata.

Imm. 4-mut

Annertussutsimik aalaakkaasumik nateqanngitsumik oqarnermi pineqartoq tassaavoq inissiami annertussuseq killiligaq, nateqarani putoqaannartoq. Assersuutigalugu inissiaq inip inissisimaffianik qulereeqarsinnaavoq qaliaqarlunilu. Qaliani teqqut ilaanni ineqarpoq sinaakkutinik killilernerqarsimasumik, taannalu nateqanngissinnaavoq, tassangaanniillu inimut alakkartoqarsinnaalluni. Teqqoq taanna aalaakkaasumik nateqanngilaq, taamaattumillu majuartarfeqanngikkuni inissiap annertussusaata uuttortarneqarnerani ilanngunneqartussaani.

Imm. 5-imut

Paarliit ataatsimoorussat, majuartarfiit majuartarfiillu sangoriaat annerpaamik 11 kvadratmeterimik annertussusilerlugit ilanngunneqarsinnaapput, tassalu 110 kvadratmeterit taarsigassarsititsiviusinnaasut annerpaaffissaata 10 procentiannik annertussusilerlugit. Inissiaq 110 kvadratmeterinit annertuneruppat, paarliit ataatsimoorussat, majuartarfiit majuartarfiillu sangoriaat sulii annerpaamik 11 kvadratmeterimik annertussusilerneqassapput.

§ 6-imut

Aalajangersakkami imm. 1 aamma 2 najoqqutassatigut allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 2, imm. 3-mut aamma 4-mut assingusuupput, kiisalu imm. 3 nutaajulluni.

Imm. 1-imut

Imm. 1 najoqqutassatigut allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 2, imm. 3-mut aamma assingusuvoq. Imm. 1-imi agguaqatigiisitsilluni naatsorsueriaaseq, inissiap kvadratmeterimut akiata naatsorsorneqarnerani

atorneqartartoq nassuiarneqarpoq. Inissiap kvadratmeterimut akia agguaqatigiisitsilluni naatsorsueriaaseq atorlugu inissiap sananeqarnerani aningaasartuutit tamakkiisut inissiap annertussusaanut agguarnerini nassaarineqassaaq.

Imm. 2-mut

Imm. 2 Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 2, imm. 4-p assingaa. Imm. 2-mi aningaasartuutissat suut taarsigassarsiniarluni qinnuteqartup aningaasartuutissanut tamakkiisunut ilanngutissanerai aalajangersarneqarpoq. Aningaasartuutissanut aalajangersakkami taaneqartunut assersuutigalugu aningaaserivimmut taarsigassarsinermut aningaasartuutit, eqqartuussissuserisumut akiliutit, qularnaveeqqusiussaqaarluni taarsigassarsinermi allakkamut ilassutip naqissuserneqarneranut nalunaarsorneqarneranullu aningaasartuutit, sanaartornermik nakkutilliinermut aningaasartuutit, aningaasartuutillu allat sanaartornermut tunngassuteqartut ilaapput. Taarsigassarsiniarluni qinnuteqartup aningaasartuutissat attuumassuteqartut tamarmik naatsorsuinermut ilanngunneqarnissaat akisussaafigaa. Naalackersuisut taarsigassarsinissamik neriorsuutaat taarsigassarsiniarluni qinnuteqartup aningaasartuutissat pillugit paasissutissiissutai tunngavigalugit naatsorsorneqassaaq.

Imm. 3-mut

Imm. 3 nutaajuvoq, aammalu taarsigassarsiniarluni qinnuteqartup nammineq suliaasa nalinginut tunngasuulluni. Taarsigassarsiniarluni qinnuteqartup nammineq sulinerata nalingata sanaartornermut aningaasartuutininut tamakkiisunut ilanngunneqannginnissaata toqqarneqarneranut peqqutaavoq, taarsigassarsiniarluni qinnuteqartup nammineerluni sulinera sanasut suliaattut illersorneqarsinnaanersoq nalilissallugu ajornarmat. Taamaattumik tamanna pissappat taarsigassarsisup sulinerata sanaartornermut aningaasartuutininut ilanngunneqarnermini qanoq naleqarnissaa aqussallugu ajornartussaavoq.

§ 7-imut

Aalajangersakkap najoqqutassatigut annikitsunik allannguuteqartinneqaarluni Inatsisartut peqqussutaanni nr. 4-mi, 30. oktober 1998-imeersumi § 5, imm. 1, 2 aamma 4 assingai.

Imm. 1-imut

Imm. 1-ip najoqqutassatigut annikitsunik allannguuteqartinneqaarluni Inatsisartut peqqussutaanni nr. 4-mi, 30. oktober 1998-imeersumi § 5, imm. 1-ip immikkoortua siulleq assingaa. Imm. 1-imi pisortanit iluarsaassinermut, pitsanngorsaannermut alliliinermullu taarsigassarsiat, katillugit 40 procentinik annertussuseqartut piffissap qanoq ilinerani tunniunneqarnissaat aalajangersarneqarpoq. Taarsigassarsisup sanaartornermut naatsorsuutit inaarutaasut inummit allamit, suliamut

attuumassuteqanngitsumit suliarineqarnissaat atsiorneqarnissaallu akisussaaffigaa. Sanaartornermut naatsorsuutit, assersuutigalugu taarsigassarsisup aningaasalersuinermit siunnersortaanit, kukkunerisuisuanit, sanatitsisutut siunnersuisuanit imaluunniit sanasumit, sanaartornermik isumaginnittuusimasumit atsiorneqarsinnaapput. Taarsigassarsisup nammineerluni, imaluunniit taarsigassarsisup eqqartuussissuserisuata, aningaaseriviata taarsigassarsisumulluunniit siunnersortasup allap Naalakkersuisut taarsigassarsiarititaannut qularnaveeqqutitut qularnaveeqqusiussaqaarluni taarsigassarsinermit allagartap suliarineqarnissaa, tamatuma ataani qularnaveeqqusiussatut allagartap Akileraarnermut Pisortaqaarfimmit naqissuserneqarnissaa aammalu Kalaallit Nunaanni eqqartuussiviup nalunaarsuisarfianut nalunaarsorneqarnissaa isumagissavaa, tamatumalu kingorna qularnaveeqqusiussaqaarluni taarsigassarsinermit allagartap naqeqqaarnera Naalakkersuisunut, taanna tunngavigalugu taarsigassarsianik tunniussisussanut nassitissallugu. Kiisalu taarsigassarsisup inissiap sillimmaserneqarnissaa, aammalu sillimmasiissutip qularnaveeqqusiussamik piginnittup nalunaarutaani allanneqarnissaa isumagissavaa, tamatumalu kingorna taarsigassarsisup sillimmasiisarfia inissiamut sillimmasiissut assersuutigalugu piginnittut nikinnerisa imaluunniit sillimmasiissummut akiitsoqarnerup kingunerisaanik taamaatinneqarpat, tamanna pillugu Naalakkersuisunut nalunaaruteqartussanngussaaq.

Nutaatut imm. 1-imi Naalakkersuisut taarsigassarsiarititaasa siusinnerpaamik piffissap qanoq ilinerani tunniunneqarsinnaanerit erseqqissarneqarpoq. Naalakkersuisut 2009-mi taarsigassarsiarititassanik neriorsuuteqarsimappata, taarsigassarsinissamik qinnuteqartup Naalakkersuisut taarsigassarsiarititassaasa tunniunneqarnissaat 2009-mut utaqqisariaqassavaa, tassani iluarsaassineq, pitsanngorsaaneq alliliinerluunniit 2008-mi naammassineqarsimagaluarpat inatsisillu malillugit atorneqalersimagaluarpat.

Imm. 2-mut

Imm. 2-p imamigut Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 5, imm. 1-ip immikkoortuata tullia assingaa. Pisortanit taarsigassarsiarititat inissiap, Kalaallit Nunaanni qularnaveeqqusiisarneq pillugu inatsit naapertorlugu nalunaarsorneqarsimasoq qularnaveeqqusiullugu qulakkeerneqassapput. Pisortanit taarsigassarsiarititat inissiap qularnaveeqqusiunneratigut qulakkeerneqarpat, pisortanit taarsigassarsiarititat tulleriaarnerisa inissisimaffissaat aalajangersakkami aalajangersarneqarpat. Qularnaveeqqusiussaqaarluni taarsigassarsinermit allagartami qularnaveeqqusiussamik pigisaqartup pingaarnerup akiitsut annertusissutaanik nalunaaruteqarnissamut periarfissaa allassimavoq. Kalaallit Nunaanni qularnaveeqqusiisarneq pillugu inatsit aamma qularnaveeqqusiisarneq pillugu maleruagassat nalinginnaasut tassani atuupput.

Imm. 3-mut

Imm. 3-p annikitsunik oqaasertamigut allannguuteqartinneqaarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut

allannguuteqartinneqartumi § 5, imm. 2 assingaa. Aalajangersakkami pisortat taarsigassarsiarititaasa qanoq akilersorneqarnissaat nassuiarneqarpoq. Ukiuni 15-ini taarsigassarsiat akilersorneqarfissaanni erniarititassaq aalajangersimavoq. Erniarititassaq piffissamut akilersuiffiusussamut tamakkiisumut atuinissamut akuersissutip ulluata kingorna ukiuni 20-ni diskonto 3 procentpointinik ilallugu aalajangersarneqassaaq.

Imm. 4-mut

Imm. 4-p oqaasertamigut allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 5, imm. 4 assingaa. Aalajangersagaq Naalakkersuisut pisortanit taarsigassarsiat akilersornissaannut maleruagassanik aalajangersaasinnaanissaannut tunngaviliivoq. Piginnaatitsissut suli atorneqanngilaq. Peqqussut naapertorlugu taarsigassarsinissamut neriorsuutit siulliit 1998-imi tunniunneqarsimappata, aammalu ukiuni 15-ini erniaqaratillu akiligassaangippata, tamatumalu kingorna 1998-imi taarsigassarsiarititaasut 2013-imi akilerneqartussanngorpata, piginnaatitsinermut aalajangersakkap piffissaq tamanna sioqqullugu atorneqannginnissaa eqqarsaatigineqarpoq. Piginnaatitsinermut aalajangersakkap atorneqarnissaata tungaanut taarsigassarsiat akilerneqartussanngortut kontomut pingaarnermut 20.10.22-mut, "isertitat allat"-nut isertitatut nalunaarsorneqassapput, tamatumalu kingorna Nunap Karsianut tutsinneqassallutik.

§ 8-mut

Aalajangersakkami imm. 1 nutaajuvoq, aammalu Inatsisartut inatsisaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 5, imm. 3-p immikkoortuanut siullermut taartaalluni. Aalajangersakkap imm. 2-a nutaajuvoq.

Imm. 1-imut

Imm. 1-imi nutaatut aalajangersarneqarpoq, pisortanit taarsigassarsiarititat piginnittut nikinneranni akiligassanngortinneqassanngitsut. Aalajangersagaq piginnittut nikinnerannut qanorluunniit ilusilinnut atuuppoq, assersuutigalugu inuinnaat akornanni, inatsisitigut pisinnaatitaasut pisussaataitaasullu akornanni piginnittut nikinnerannut imaluunniit inuinnaat inatsisitigullu pisinnaatitaasut pisussaataitaasullu akornanni piginnittut nikinnerannut.

Inatsisartut inatsisaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 5, imm. 3-p immikkoortuani siullermi malitassaq pingaarneq tassaavoq Naalakkersuisut kommunalbestyrelsillu taarsigassarsiarititaat piginnittut nikinneranni akiligassanngortinneqassasut, tamatumani Naalakkersuisut kommunalbestyrelsilu allamik aalajangigaqarsimanngippata. Suleriaaseq malillugu § 5, imm. 3-p immikkoortuata siulliup aquneqarnerani taarsigassarsiat akiligassanngortinneqaratik piginnittut nikinnissaat akuerineqartarpoq, tamatumani piginnittut nikinnerat tunisisup inuinnaasup aammalu pisisup inatsisitigut

pisinnaatitaasup pisussaatitaasullu, peqqussut malillugu atuuttunik taarsigassarsiaqareersup akornanni pisimangippat. Maannamut suleriaasiusimasoq peqqussutissatut siunnersuummut toqqaannartumik allanneqarpoq, tassani pisortat taarsigassarsiarititaasa piginnittut nikinneranni akiligassanngortinneqartarunnaarnissaat allannguutigineqarluni, tamatumani illuatungeriit piginnittumik nikisitsiffiusut kikkugaluarpataluunniit.

Inatsisartut peqqussutaat nr. 4, 30. oktober 1998-imeersoq, kingusinnerusukkut allannguuteqartinneqartoq naapertorlugu taarsigassarsiarititat aamma siunnersuummi aalajangersakkanut ilaatinneqarput, taamaalillunilu taakkuttaaq piginnittut nikinneranni akiligassanngortussaajunnaarlutik.

Imm. 1 piffissap qanorluunniit ilinerani piginnittut nikinnerannut atuuppoq, tassalu inissiaq sananeqartoq suli naammassinngitsoq piginnittut nikinnerat imaluunniit inissiaq naammassereersoq piginnittut nikinnerat apeqqutaatinneqarani.

Imm. 2-mut

Imm. 2-mi piginnittut nikinneranni taarsigassarsiat ataatsit arlallilluunniit Naalackersuisut kommunalbestyrelsillu taarsigassarsiarititaannit salliutinneqartussat annertussusissaat aalajangersarneqarput. Naalackersuisut kommunalbestyrelsillu taarsigassarsiarititaannit taamaallaat salliutinneqassapput taarsigassarsiat aammattaaq inissiaq qularnaveeqqusiullugu qulakkeerneqarsimasut. Piginnittoq nutaaq nutaanik taarsigassarsissaaq imaluunniit piginnittuusimasup taarsigassarsiai tigussallugit.

Atuuffissaa imatut assersuusiorlugu takutinneqarsinnaavoq:

Tunisisoq inissiamik 110 kvadratmeterimik, kvadratmeterimut 16.000 koruuninik akeqartumik sanasimavoq.

Inissiap sananeqarneranut aningaasartuutit tamakkiisut 1.760.000 koruuniupput, taakkunanngalu 283.500 koruunit Naalackersuisunit taarsigassarsiaapput, aammalu 283.500 koruunit kommunalbestyrelsimit taarsigassarsiaallutik, kiisalu taarsigassarsisup aningaasartuutinit sinneruttut 1.193.000 koruuniusut taarsigassarsinermigut, amerlanertigut kreditforeninginit taarsigassarsiaasartunik, nammineerluni aningaasalersorsimavai.

Inissiap sananeqarneranit ukiut tallimat qaangiuttut piginnittup inissiaq tunivaa. Inissiaq 2.200.000 koruuninik nalilerlugu tunineqarpoq. Pisisoq piginnittut nikinnerannut atatillugu 2.200.000 koruunit 90 procentiinik kreditforeninginit nutaanik taarsigassarsinissamut periarfissaqarpoq, taakkunanngaanniillu 283.500 koruunit marluk, tassalu Naalackersuisunit kommunalbestyrelsimillu taarsigassarsiat annertoqataat ilanngaatigineqassapput. Tassalu pisisoq kreditforeninginit annerpaamik 1.413.000 koruuninik, taakkulu Naalackersuisunit kommunalbestyrelsimillu taarsigassarsianit salliutinneqassapput.

Pisisup nutaanik Naalackersuisunit kommunalbestyrelsimillu taarsigassarsianit salliutinneqartussanik taarsigassarsiassaasa annerpaaffilerneqarnera ilanngunneqarpoq, piginnittut nikinneranni Naalackersuisut kommunalbestyrelsimillu qularnaveeqqusiiffigineqarnerisa ingerlaannarsinnaanera qulakkeerniarlugu.

§ 9-mut

Nr. 1-imi aamma 2-mi aalajangersakkat oqaasertamikkut annikitsunik allannguuteqartinneqarlutik Inatsisartut peqqussutaanni nr. 4-mi, 30. oktober 1998-imeersumi, kingusinnerusukkat allannguuteqartinneqartumi § 5, imm. 3-p immikkoortuata siulliup tulliullu assigaat, kiisalu nr. 3, 4 aamma 5 nutaajullutik.

Aalajangersakkami qanoq pisoqartillugu Naalackersuisut kommunalbestyrelsimillu taarsigassarsiarititaasa akiligassanngortinneqarsinnaanerat allassimavoq.

Nr. 1-imut

Taarsigassarsisup piffissaq eqqorlugu ernianik akilersuutinillu akiliinnginnerata kingunerisaanik taarsigassarsiat akiligassanngortinneqassapput. Taamaattumik taarsigassarsisoq taarsersukkaminik akilersuisinnaanngikkuni Naalackersuisunut kommunalbestyrelsimulluunniit akilersuinissamik isumaqatigiissusiorsinnaanngilaq.

Kalaallit Nunaanni qularnaveeqqusiisarneq pillugu Inatsisartut inatsisaat atuuttoq malillugu piffissap naannginnerani pigisamik aalaakkaasumik qularnaveeqqusiussaqluni taarsigassarsinermut allagartaq malillugu ernianut akilersukkanullu akiliisimassaaq, taarsigassarsisoq tamanna pillugu allakkatigut, Naalackersuisunit kommunalbestyrelsimilluunniit nassiunneqartukkat saqqummiunneqartukkulluunniit peqquneqarnerminit kingusinnerpaamik ullut arfineq marluk qaangiunnerini ernianut akilersukkanullu akiliisimaguni. Naalackersuisut kommunalbestyrelsimilluunniit akileeqqusissutaat ullup akiliiffissap eqqortup kingorna saqqummiunneqarsimassaaq, tassanilu ersarissumik allassimassalluni, piffissarititaasup naannginnerani erniat akilersuutillu akilerneqarsimanngippata aningaasaatit akilerneqassasut. Akileeqqusissut akiitsulimmut anngutsinniarlugu Kalaallit Nunaanni inoqarfiit akornanni, aamma Kalaallit Nunaata naalagaaffeqatigiinnermilu nunat ilaasut akornanni nassiunneqassappat, akiitsullip akileeqqusissummik tigusaqarneraniit akiliinissamut piffissarititaasoq ullunik arfineq marlunnik sivisussuseqarpoq, tamatumani akileeqqusissut nalunaarasuartaatitigut atortut atorlugit akiitsulimmut nassiunneqarsimanngippat.

Nr. 2-mut

Taarsigassarsisoq pisussaavoq inissiaq illersorsinnaasumik aserfallatsaalissallugu. Taamatut oqarnermi eqqarsaatigineqarpoq, taarsigassarsisup pisariaqartitsinermi illup ilaanik taarsersuisussaanaera imaluunniit iluarsaassisussaanaera, tamannalu amerlanertigut soorlu qilaap ussiitsup imaluunniit igalaat ussiitsut taarsersortariaqalernerisigut pisarpoq. Kiisalu taarsigassarsisoq inissiami tulleriaaraluni aserfallatsaaliuisussaavoq, soorlu inissiap silataa pisariaqalerfiatigut qalipattartussaavaa. Suleriaaseq malillugu Naalackersuisunit

kommunalbestyrelsimillu qularnaveeqqusiussamik piginnittup misissuiffigisarneratigut nr. 2 malitsinneqarpoq, tassanilu qularnaveeqqusiussaq pigineqarnersoq aammalu aserfallatsaalineqarnersoq misissorneqartarpoq.

Nr. 3-mut

Nutaatut inissiap ikuallattoornissamut anorersuarneranilu ajoqusernissamut sillimmaserneqannginnera taarsigassarsiat akiligassanngortinneqarnissaannut tunngavigineqarsinnaalerpoq, inissiami sillimmasigaanngitsumi annertuunik ajoqusertoqassappat, Naalakkersuisut kommunalbestyrelsimillu qularnaveeqqutaata annertuumik nalikillineranik kinguneqarsinnaammat. Ikuallattoornissamut anorersuarneranilu ajoqusernissamut sillimmasiinissaq pillugu piumasaaqatip sukumiinerusumik nassuiarneqarneranut § 17-imut oqaaseqaatit innersuunneqarput.

Nr. 4-mut

Nr. 4 naapertorlugu nutaatut inissiamik attartortittakkamik namminersortunit pigineqartumik attartortitsinermit, taarsigassarsisup aningaasartuutit malillugit attartornermut akiliutissamit qaffasinnerusumik akeqartitsilluni attartortitsinera taarsigassarsiat akiligassanngortinneqarnerinut tunngavigineqarsinnaalerpoq. Tamanna tunngavigalugu taarsigassarsisooq annerpaamik aningaasartuutit naapertorlugit attartortitsinermit akigititassaq, inissianik attartortitsisarneq pillugu Inatsisartut peqqussutaanni nr. 2-mi, 12. maj 2005-imeersumi aalajangersarneqartoq taarsigassarsisup aningaasalersuinermit aningaasartuutai uppernarsarneqarsimasut, ingerlatsinermit aningaasartuutai uppernarsarneqarsimasut aammalu inissiap teknikkikkut aningaasaqarnikkullu nalinganut erniarititat, diskontop affaanik naleqartut pillugit aalajangersarneqartut tunngavigalugu annertussusilertussaavaa.

Kiisalu pisortat inissiaataannik attartortittakkamik, taasigassarsisut sinnerisa inissiamut aningaasartuutaannit qaffasinnerusumik akeqartitsilluni attartortitsineq taarsigassarsiat akiligassanngortinneqarnerinut tunngavigineqarsinnaalerpoq. Tassalu taarsigassarsisup inissiaq aki, ilaatigut taarsigassarsisup aningaasaatinut iluanaarutissanut aningaasartuutaanut kiisalu ingerlatsinermit atatillugu, tassungalu ilanngullugu allaffissornermut akiliummut aningaasartuutinut ilaatitsiffiusooq atorlugu attartortissinnaavaa.

Inissianik attartortitsisarneq pillugu Inatsisartut peqqussutaanni pisortat namminersortullu inissiaataanni attartortittakkani attartornermut akiliut allanngortinneqarpat, siunnersuummi matumani nr. 4-mi innersuussutaasoq inissianik attartortitsisarneq pillugu Inatsisartut peqqussutaanni pisortat namminersortullu inissiaataanni attartortittakkani attartornermut akiliutip naatsorsorneqartarnera pillugu maleruagassanut sukkulluunniit atuuttunut innersuussutitut paasineqassaaq.

Ineqarnermut akiliutip aalajangersarneqartarnera pillugu attartortitsinermit peqqussummi aalajangersakkani pineqaatissiisinaanissaq pillugu aalajangersaanissaq immikkut pisariaqartutut isumaqarfigineqarpoq, siunnersuummi matumani Naalakkersuisut kommunalbestyrelsilu taarsigassarsititsisutut ineqarnermut akiliutip attartortitsinermit peqqussummi ineqarnermut akiliummik aalajangersaasarneq pillugu maleruagassat uniorneqarnerat uparuarsinnaammasuk,

kiisalu attartortitsineranut peqqussummi attartortup ineqarnermut akiliutip annertussilernerani attartornermut peqqussummi tamanna pillugu aalajangersakkat uniorneqarnerat saqqummiussinnaallugu.

Kiisalu Naalackersuisut kommunalbestyrelsilu taarsigassarsititsisutut taarsigassarsisumut attartortitsisumullu, akit naapertuutinngilluinnartut atorlugit inissiaatiminnik attartortitsisumut pineqaatissiisinnaanissat kissaatiginarpoq.

Nr. 5-imut

Naalackersuisut kommunalbestyrelsilu taarsigassarsisoq inissiami najukkamini inuussutissarsiummik ingerlataqassanersoq pillugu suliamut tunngatillugu naliliisassapput. Tamatumanissaaq siunnersuummi § 1, imm. 2-mut oqaaseqaatit innersuunneqarput.

§ 10-mut

Aalajangersakkami imm. 1-ip aamma 2-p najoqqutassatigut arlalinnik allannguiffigineqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9, imm. 1 aamma § 2, imm. 4 assingai, kiisalu imm. 3 nutaajulluni.

Imm. 1-imut

Imm. 1-ip najoqqutassatigut allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9 imm. 1 assingaa. Aalajangersakkami Naalackersuisut iluarsaassinermut, pitsanngorsaanermut alliliinermullu taarsigassarsititsisinnaanerat aalajangersarneqarpoq, nutaatullu aamma inissianik pioereersunik alliliinissaq ilanngunneqarluni. Tassani Naalackersuisut taarsigassarsititsinissaat kisimi periarfissaavoq.

Inuunnaat inissiamik pigisaqartut piffissamilu pineqartumi inissiami tassani najugaqartut tamarmik taarsigassarsinissamik qinnuteqarsinnaapput. Tassani aamma assersuutigalugu inissiat, attartortumiit piginnittumut aaqqissuussineq malillugu tiguneqarsimasut pineqarput, tak. Namminersornerullutik Oqartussat kommunillu inissiaataasa attartortittakkat inissiatut nammineq pigisatut allanngortinneqartarnerat pillugu Inatsisartut peqqussutaanni maleruagassat.

Kisiannili BSU-mit taarsigassarsilluni illuutilik, akilersukkaminik taarsigassarsiaqartoq iluarsaassinissamut, pitsanngorsaanissamut alliliinissamullu taarsigassarsinissamik qinnuteqarsinnaanngilaq, BSU-mit taarsigassarsilluni illuliaq akilersorneqartunik taarsigassarsiviusimasoq inissiatut nammineq pigisavittut inissisimannngimmat, tak. inissialiortiternermut tapersiissuteqartarneq pillugu Inatsisartut peqqussutaanni maleruagassat. Taarsigassarsiat akilersorneqartut tassaapput taarsigassarsiat, piginnittoq akilinngitsuukkaminik akiitsoqaraluarpat akiitsoqanngikkaluarpalluunniit, aammalu taarsigassarsiat inissialiortiternermut tapersiissuteqartarneq pillugu Inatsisartut peqqussutaanni maleruagassat malillugit

allanngortinneqarsimagaluarpataluunniit suli ingerlasut, taamaattumillu piginnittoq taarsersukkaminut akiliisannikkaluarpalluunniit piffissamut sinneruttumut nalikillineqartarput.

Imm. 2-mut

Imm. 2 Inatsisartut peqqussutaanni nr. 4-mi, 30. oktober 198-imeersumi, kingusinnerusukkut allannguuteqartinneqartumi § 2, imm. 4-p assingaa. Imm. 2-mi aningaasartuutissat suut taarsigassarsiniarluni qinnuteqartup aningaasartuutissanut tamakkiisunut ilanngutissanerai aalajangersarneqarpoq. Aningaasartuutissanut aalajangersakkami taaneqartunut assersuutigalugu aningaaserivimmut taarsigassarsinermut aningaasartuutit, eqqartuussissuserisumut akiliutit, qularnaveeqqusiussaqaarluni taarsigassarsinermi allakkamut ilassutip naqissuserneqarneranut nalunaarsorneqarneranullu aningaasartuutit, sanaartornermik nakkutilliisoqassappat tassunga aningaasartuutit, aningaasartuutillu allat iluarsaassinermut, pitsanngorsaaneermut alliliinermullu tunngassuteqartut ilaapput. Taarsigassarsiniarluni qinnuteqartup aningaasartuutissat attuumassuteqartut tamarmik naatsorsuinermut ilanngunneqarnissaat akisussaaffigaa. Naalakkersuisut taarsigassarsinissamik neriorsuutaat taarsigassarsiniarluni qinnuteqartup aningaasartuutissat pillugit paasissutissiissutai tunngavigalugit naatsorsorneqassaaq.

Imm. 3-mut

Imm. 3 nutaajuvoq, aammalu taarsigassarsiniarluni qinnuteqartup nammineq suliaasa nalinginut tunngasuulluni. Taarsigassarsiniarluni qinnuteqartup nammineq sulinerata nalingata sanaartornermut aningaasartuutinut tamakkiisunut ilanngunneqannginnissaata toqqarneqarneranut peqqutaavoq, taarsigassarsiniarluni qinnuteqartup nammineerluni sulinera sanasut suliaattut illersorneqarsinnaanersoq nalilissallugu ajornarmat. Taamaattumik tamanna pissappat taarsigassarsisup sulinerata sanaartornermut aningaasartuutinut ilanngunneqarnermini qanoq naleqarnissaa aqussallugu ajornartussaavoq.

§ 11-mut

Aalajangersagaq nutaajuvoq, tassanilu Naalakkersuisut iluarsaassinissamut pitsanngorsaaniissamullu taarsigassarsititsisarnerannut killissarititaasut saqqummiunneqarput. Aalajangersakkap Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9, imm. 4 taarserpaa, taannalu Naalakkersuisut iluarsaassinermut pitsanngorsaaneermullu maleruagassanik sukumiinerusunik aalajangersaasinnaanerannut tunngavissanik imaqarpoq.

Imm. 1-imut

Imm. 1-imi iluarsaassinissamut pitsanngorsaaniissamullu taarsigassarsinissamik qinnuteqarnermi piumasqaataasut aalajangersarneqarput. Piffissaq qinnuteqarfiusoq

tassaavoq piffissaq qinnuteqaatip Naalakkersuisunit tiguneqarfia aammalu allakkatut isertinneqarfia.

Pisoqaassusissamut kvadratmeterinullu killiliussanut siunertaasoq tassaavoq, taarsigassarsiat illunut minnerusunut pisoqaanerusunullu, iluarsaaneqarnissamut pitsanngorsarneqarnissamullu pisariaqartitsiviorpiartunut siunnerfeqarnissaat, kiisalu illunik nutaanerusunik piginnittut iluarsaassinernut pitsanngorsaanernullu aningaasalersuisinnaassuseqarnissaasa naatsorsuutigineqarnera.

Imm. 2-mut

Imm. 2-mi iluarsaassinernut pitsanngorsaanernullu taarsigassarsititsiviusinnaasunut assersuutit arlallit saqqummiunneqarput. Assersuutini takutinneqartut iluarsaassinerit pitsanngorsaanerillu taarsigassarsititsiviusinnaasut inissiami atortunut tunngaviusunut tunngasuunerarput. Taamaattumik igaffik nutaanngitsuusimangippat atoruminaatsuusimangippallu, aammalu igaffik nutaaq nalinginnaasuusangippat inuulluataarniutaasunillu atortulersuutinik ilalerneqarpat nutaamik igaffittaarnissamut taarsigassarsisoqarsinnaassanngilaq. Pisulli ilaanni taamatut taarsersuinissaq suliassat aalajangersakkami ilaatinneqartut sularineqarnerinut atatillugu pisinnaavoq. Assersuutigalugu eqqiluisaarnernut atortunik taarsersuineq ikkussuinerluunniit inissiap imermut igitassamut kuuffiata sularineqarneranut atatillugu pisinnaavoq, taamaalillunilu suliassanut taakkununga taarsigassarsititsisoqarsinnaalluni.

Ataatsimut isigalugu iluarsaassinernut pitsanngorsaanernullu inuulluataarniutinik atortoqartunut taarsigassarsititsisoqarsinnaanngilaq, soorlu uffarfinnik supoortulinnik, saunanik, igaffinnik akisuunik, uffarfinnik akisuunik aammalu atortulersuutinik immikkut ittunik akisuunik. Naggataagulli suliamut aalajangersimasumut naliliineq tunngavigalugu Naalakkersuisut aalajangiisussaapput.

§ 12-imut

Aalajangersagaq nutaajuvoq, tassanilu Naalakkersuisut inissianik pioreersunik alliliinissamut taarsigassarsititsisarnerannut killissarititaasut saqqummiunneqarput. Pisoqaassusissamut kvadratmeterinullu killiliussanut siunertaasoq tassaavoq, taarsigassarsiat illunut minnerusunut pisoqaanerusunullu, alliliiffigineqarnissaminnut pisariaqartitsiviorpiartunut siunnerfeqarnissaat.

Kvadratmeterinut killiliussat marluk atorneqarput, tassalu inissiaq allilerneqannginnermini annerpaamik 95 kvadratmeteriusussaavoq, aammalu allilerneqareermermi annerpaamik 110 kvadratmeteriusussaalluni. Inissiap angissusaa killiliussat taakku uniorsimappatigik, alliliinissamut taarsigassarsititsisoqarsinnaanngilaq. Tamatumani soorunami taarsigassarsisup nammineerluni alliliinermut tamarmiusumut aningaasalersuinissaa akornusersimaneqanngilaq.

Kvadratmeterimut killiliussinermi siunertaasoq tassaavoq, taarsigassarsiat inissianut minnerusunut pisoqaanerusunullu, angissutsimikkut killeqarnertik peqqutigalugu alliliiffigineqarnissaminut pisariaqartitsiviorpiartunut siunnerfeqarnissaat. Aalajangersagaq pingaartumik inissianut nutaanngitsunut amerlanertigullu mikisuusartunut, soorlu namminerisamik aningaasalersorlugit imaluunniit inissialiortiternermut tapersiissuteqartarnek aqqutigalugu sananeqarsimasunut, kisiannili pisortanit taarsigassarsiat akilerneqareersimanagerat peqqutigalugu aaqquissuussinermiit peerneqarsimasunut tunngatinneqarpoq.

§ 13-imut

Aalajangersakkami imm. 2-4 najoqqutassatigut arlalinnik allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9, imm. 2-p aamma 3-p assingai. Imm. 1, 5 aamma 6 nutaajupput.

Imm. 1-imut

Imm. 1 nutaajuvoq, tassanilu Naalackersuisut iluarsaassinermut, pitsanngorsaanermut alliliinermullu annerpaamik 283.500 koruuninik taarsigassarsititsisinnaanerak aalajangersarneqarpoq. Taamaattumik taarsigassarsisup taarsigassarsitinneqarsinnaassaguni aningaasartuutai tamakkiisut 708.750 koruuniussapput, taakkunanngalu 40 procentit imaluunniit 283.500 koruunit Naalackersuisunit taarsigassarsiarititaassapput.

Imm. 2-mut

Imm. 2-p Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9, imm. 2 assingaa. Aalajangersakkap atuutilerneqatigut taarsigassarsisup nammineerluni taarsigassarsiarititat saniatigut aningaasartuutissat tamaasa aningaasalersortartussanngussavai. Tassani taarsigassarsisup aningaasartuutissat sinnerisa qanoq iliorluni aningaasalersussanerai piunasaqaatigineqanngilaq. Tamanna aningaasanik nammineq akiliinikkut, aningaaserivimmit taarsigassarsinikkut imaluunniit realkredittimit taarsigassarsinikkut pisinnaavoq.

Imm. 3-mut

Imm. 3 imamigut Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9, imm. 3-p immikkoortuata siulliup assingaa. Taarsigassarsiat erniaqartinneqanngillat akilersugassaanatillu, tamatumani aamma siunertaanngilaq Naalackersuisut taarsigassarsiarititaasa siunissami piffissap aalajangersimasup ingerlanerani akilersorneqarnissaat, taamatullu Naalackersuisut kommunalbestyrelsillu inissianik nutaanik aningaasalersuinissamut taarsigassarsiarititaat pineqarlutik.

Imm. 4-mut

Imm. 4 najoqqutassatigut annikitsunik allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 9, imm. 3-p immikkoortuata tulliata assingaa. Inatsisitigut inissisimaneq maannamut atuuttoq ingerlateqqinneqarpoq, taamaattumillu taarsigassarsiarititat tunngaviusumik piginnittut nikinneranni akiligassanngortinneqartassallutik. Maannali peqqussutip oqaasertaanni toqqaannartumik allassimalerpoq aappariit akornanni piginnittut nikinneranni Naalakkersuisut taarsigassarsiarititaat akiligassanngortinneqassanngitsut, tamannalu maannamut periaasiusumut naapertuuppoq. Kiisalu taarsigassarsititsisoq pisuni allani piginnittut nikinneranni taarsigassarsiat akiligassanngortinneqannginnissaannik aalajangiisinnaavoq. Tamatumani pingaartumik taarsigassarsisoq toqusimappat, aammalu taarsigassarsisup aapparisaata inissiami najugaqaannarnissani toqqarpagu piginnittut nikinnerat pineqarpoq. Tamanna aappariit akornanni piginnittut nikinnerannut, taamaallaat aappariit suli inuusut akornanni piginnittut nikinnerannut tunngasuumut toqqaannartumik attuumassuteqanngilaq.

Imm. 5-imut

Imm. 5 nutaajuvoq, tassanilu inissiamut ataatsimut iluarsaassinissamut, pitsanngorsaannissamut alliliinissamullu ataasiinnarnik taarsigassarsititsisoqarsinnaanera aalajangersarneqarpoq. Kingusinnerusukkut piginnittut nikikkaluarpaluunniit tamanna atuutissaaq. Taamaattumik iluarsaassinissamut, pitsanngorsaannissamut alliliinissamullu arlalinnik taarsigassarsisoqarsinnaanngilaq. Aalajangersakkami tamatumani Naalakkersuisut kisimik inissiami iluarsaassinernut annertunerusunut, pitsannguinnernut annertunerusunut kiisalu alliliinnernut taarsigassarsititsinermikkut aningaasalersuisinnaanerat siunertarineqarpoq. Tassani piginnittup inissiami aserfallatsaaliuinnermut ingerlaavartumut aningaasartuutaanut Naalakkersuisut taarsigassarsititsisinnaanerat pineqanngilaq. Tamatumunnga aningaasartuutit piginnittup nammineerluni akilertariaqarpai. Siusinnerusukkut peqqussutit oqaasertaani piginnittup qanoq akulikitsigisumik iluarsaassinissamut, pitsanngorsaannissamut alliliinissamullu Naalakkersuisunit taarsigassarsisinnaanerat allassimanngilaq, taamaattumillu taarsigassarsisarnermi aaqqissuussinerup aqunneqarnerani nalorninartorsioertitsisarsimalluni. Nalornissuteqartarneq tamanna iluarsiiiffiginarlugu maanna peqqussutip oqaasertaani tamanna toqqaannartumik erseqqissarneqarpoq.

§ 14-imut

Aalajangersagaq nutaajuvoq, aammalu maannamut suleriaasiusut inatsisillu akornanni naapertuuttunngortitsinissaq pilersinniarlugu ikkutaalluni.

Imm. 1-imut

Aalajangersakkami iluarsaassinermut, pitsanngorsaannermut alliliinnermullu taarsigassarsiat piffissap qanoq ilinerani tunniunneqarnissaat aalajangersarneqarpoq.

Taarsigassarsisup sanaartornermut naatsorsuutit inaarutaasut inummit allamit, suliamut attuumassuteqanngitsumit suliarineqarnissaat atsiorneqarnissaallu akisussaaffigaa. Sanaartornermut naatsorsuutit, assersuutigalugu taarsigassarsisup aningaasalersuinermit siunnersortaanit, kukkunersiuisuanit, sanatitsisutut siunnersuisuanit imaluunniit sanasumit, sanaartornermik isumaginnittuusimasumit atsiorneqarsinnaapput. Taarsigassarsisup nammineerluni, imaluunniit taarsigassarsisup eqqartuussissuserisuata, aningaaseriviata taarsigassarsisumulluunniit siunnersortaaup allap Naalakkersuisut taarsigassarsiarititaannut qularnaveeqqutitut qularnaveeqqusiussaqaarluni taarsigassarsinermut allagartap suliarineqarnissaa, tamatuma ataani qularnaveeqqusiussatut allagartap Akileraarnermut Pisortaqaarfimmit naqissuserneqarnissaa aammalu Kalaallit Nunaanni eqqartuussiviup nalunaarsuisarfianut nalunaarsorneqarnissaa isumagissavaa, tamatumalu kingorna qularnaveeqqusiussaqaarluni taarsigassarsinermut allagartap naqeqqaarnera Naalakkersuisunut, taanna tunngavigalugu taarsigassarsianik tunniussisussanut nassitissallugu. Kiisalu taarsigassarsisup inissiap sillimaserneqarnissaa, aammalu sillimmasiissut qularnaveeqqusiussamik piginnittup nalunaarutaani allaneqarnissaa isumagissavaa, tamatumalu kingorna taarsigassarsisup sillimmasiisarfia inissiamut sillimmasiissut assersuutigalugu piginnittut nikinnerisa imaluunniit sillimmasiissummut akiitsoqarnerup kingunerisaanik taamaatinneqarpat, tamanna pillugu Naalakkersuisunut nalunaaruteqartussanngussaaq.

Nutaatut imm. 1-imi Naalakkersuisut taarsigassarsiarititaasa siusinnerpaamik piffissap qanoq ilinerani tunniunneqarsinnaanerit erseqqissarneqarpoq. Naalakkersuisut 2009-mi taarsigassarsiarititassanik neriorsuuteqarsimappata, taarsigassarsinissamik qinnuteqartup Naalakkersuisut taarsigassarsiarititassaasa tunniunneqarnissaat 2009-mut utaqqisariaqassavaa, tassani iluarsaassineq, pitsanngorsaaneq alliliinerluunniit 2008-mi naammassineqarsimagaluarpat inatsisillu malillugit atorneqalersimagaluarpat.

Imm. 2-mut

Alliliinernut taarsigassarsiat tunniunneqarnissaannut aammattaaq atuilernermit uppersarsaat piumasarineqarpoq, taannalu alliliinerup naammassineqarsimaneranut alliliinerullu illuliornermut inatsisit atuuttut malillugit suliarineqarsimaneranut qulakkeerissutaasussaavoq.

§ 15-imut

Aalajangersagaq nutaajuvoq, akiligassanngortitsinissamullu tunngaviusussanik tallimanik imaqaarluni.

Nr. 1-imut

Aalajangersakkami nr. 1-imi allassimavoq, inissiap aserfallatsaalineqarsimannginnera pequtaalluni Naalakkersuisut qularnaveeqqusiussaqaarluni taarsigassarsinermut allagartami isumannaariffiqineqarnerat nalikillisimasoq paasineqarpat, Naalakkersuisut

taarsigassarsiarititaat akiligassanngortinneqassasut. Inissiamik sumiginnaanermut aserfallatsaaliuinnginneq ilaavoq. Suleriaaseq malillugu Naalakkersuisunit qularnaveeqqusiussamik piginnittup misissuiffigisarnertigut aalajangersagaq malitsinneqarpoq, tassanilu qularnaveeqqusiussa pigineqarnersoq aammalu aserfallatsaalineqarnersoq misissorineqartarpoq.

Nr. 2-mut

Aalajangersakkami nr. 2-mi allassimavoq, inissiaq Naalakkersuisunit iluarsaassinermut, pitsanngorsaanermt alliliinermulluunniit taarsigassarsititsivigineqarsimasoq ikuallattoornissamut anorersuarneranilu ajoqusernissamut sillimaserneqarsimanngippat, tamatuma kingunerisaanik taarsigassarsiat akiligassanngortinneqassasut. Ikuallattoornissamut anorersuarneranilu ajoqusernissamut sillimasiinissamut piunasaqaatinut nassuiaatit sukumiinerusut pillugit siunnersuummi § 17-imut oqaaseqaatit innersuunneqarput.

Nr. 3-mut

Imm. 3 naapertorlugu inissiamik attartortitsinermt taarsigassarsisoq aningaasartuutit naapertorlugit attartortitsinermt akigititaassaq sinnerlugu akeqartitsilluni attartortitsippat, tamanna nutaatut taarsigassarsiat akiligassanngortinneqarnissaannut tunngaviusussanngorpoq. Tamanna tunngavigalugu taarsigassarsisoq annerpaamik aningaasartuutit naapertorlugit attartortitsinermt akigititassaq, inissianik attartortitsisarneq pillugu Inatsisartut peqqussutaanni taarsigassarsisup aningaasalersuinermt aningaasartuutai uppernarsarneqarsimasut, ingerlatsinermt aningaasartuutai uppernarsarneqarsimasut aammalu inissiap teknikkikkut aningaasaqarnikkullu nalinganut erniarititat, diskontop affaanik naleqartut pillugit aalajangersarneqartut tunngavigalugu annertussusilertussaavaa.

Inissianik attartortitsisarneq pillugu Inatsisartut peqqussutaanni inissianik attartortittakkanik namminersortunit pigineqartunik attartortitsinermt aningaasartuutit naapertorlugit akeqartitsisarnermut aalajangersakkat allanngortinneqarpata, siunnersuummi matumani nr. 4-mi innersuussutaasoq inissianik attartortitsisarneq pillugu Inatsisartut peqqussutaanni inissianik attartortittakkanik namminersortunit pineqartunik attartortitsinermt akiliutip naatsorsorneqartarnera pillugu maleruagassanut sukkulluunniit atuuttunut innersuussutitut isigineqassaaq.

Nr. 4-mut

Naalakkersuisut kommunalbestyrelsillu taarsigassarsisoq inissiami najukkamini inuussutissarsiummik ingerlatsisinnanersoq naliliiffigisartussanngorpaat. Tamatumaniissaaq siunnersuummi § 1, imm. 2-mut oqaaseqaatit innersuunneqarput.

Nr. 5-imut

Aalajangersakkami nr. 5-imi allassimavoq Naalakkersuisut iluarsaassinermut, pitsanngorsaanermt alliliinermulluunniit taarsigassarsiarititaat taarsigassarsisup inissiaq qimallugu nuunnerani akiligassanngortinneqassasut. Tassalu tamatumani taarsigassarsiat akiligassanngortinneqassanngippata piunasaqaatigineqarpoq, taarsigassarsisup piffissami pineqartumi inissiami taarsigassarsiffigisamini

najugaqarnissaa. Taamaalillunissaaq taarsigassarsisup inissiaq pigigaluaraa, taarsigassarsisup taarsigassarsiat ingerlaannarnissaat kissaatigiguniuk taarsigassarsisup inissiaatiminik attartortitsinissaa akornuserneqarpoq.

Nalinginnaasumik inissiat amerlasuut inoqutigiinni inummit ataatsimit pigineqartarput, inoqutaasut sinneri inissiami najugaqartutut inuit allattorsimaffianni nalunaarsorneqarsimasarlutik, inissiamik piginnittutut nalunaarsorneqarsimanngikkaluarlutik. Aalajangersagaq malillugu Naalakkersuisut taarsigassarsiarititaat akiligassannngortinneqassapput, inoqutigiinni inissiamik piginnittutut nalunaarsorneqarsimasoq inissiaq qimallugu nuuppat, inoqutaasullu sinneri inissiami najugaqaannarpata. Siunnersuummi § 13, imm. 4-mi aalajangersagaq, taarsigassarsisup piginnittut nikinneranni taarsigassarsiat akiligassannngortinneqannnginnissaannik aalajangiisinnaaneranut tunngasoq pingaartumik piginnittup plejhjemmimut nuunnerani, aammalu piginnittup katissimanagu inooqataata imaluunniit piginnittup meeraasa angerlarsimaffimmi najugaqartut inissiamik tiguisussannngorneranni atorneqarsinnaasutut eqqarsaatigineqarpoq. Tamannattaq piginnittup inooqatigiinnermik kipisinerani, aammalu tamatumunnga atatillugu piginnittup inooqatigisimasaata inissiamik tiguisinerani atuutissaaq.

§ 16-imut

Aalajangersagaq najoqqutassatigut arlalinnik allannguuteqarluni aammalu oqaasertaasigut allannguuteqalaarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 8-mut assingusuvoq.

Imm. 1-imut

Imm. 1 Inatsisartut peqqussutaanni nr. 4-mi, 30. oktober 1998-imi, kingusinnerusukkut allannguuteqartinneqartumi § 8, imm. 1-ip assingaa, tassanili ilassutigineqarpoq maanna piginnittup inissiamik pioreersumik iluarsaassinissamut, pitsannngorsaanissamut alliliinissamullu taarsigassarsinermini piginnittup inissiamik illersorsinnaasumik aserfallatsaaliuinissamut pisussaaffilerneqarnissaa. Illersorsinnaasumik aserfallatsaaliuinnermik oqarnermi eqqarsaatigineqarpoq, taarsigassarsisup illup ilaanik taarsersuisussaamera imaluunniit iluarsaassisussaamera, tamannalu amerlanertigut soorlu qilaap ussiitsup imaluunniit igalaat ussiitsut taarsersortariaqalernerisigut pisarpoq. Kiisalu taarsigassarsisoq inissiami tullerriaaraluni aserfallatsaaliuisussaavoq, soorlu inissiap silataa pisariaqalerfiatigut qalipattartussaavaa. Tunngaviatigut taarsigassarsisup nammineerluni taarsersuinissaq iluarsaassinissarlunniit pisariaqarnerisooq aalajangertartussaavaa. Tamatumani inissiamik aserfallatsaaliuinnginnerup kingunerisaanik taarsigassarsisup qularnaveeqqusiussaqaarluni taarsigassarsinermut allagartaata nalinga annertuumik nalikillippat imaluunniit sumiginnarneqarpat, taarsigassarsiat akiligassannngortinneqassapput.

Taamaalilluni taarsigassarsititsisoq naggataatigut aalajangiisuusaaq, qanoq ilinerani inissiaq illersorsinnaasumik aserfallatsaaliorneqarunnaarnersoq.

Imm. 2-mut

Imm. 2 oqaasertamigut annikitsunik allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 8, imm. 2-p assingaa, aammalu inatsisitigut inissisimanermik atuuttumik ingerlatitseqqiffiulluni. Inissiap iluani allannguiq, taarsigassarsisup illuliormut maleruagassani peqqussutit, nunaminertanik atuneq pilersarusiornerlu pillugit Inatsisartut peqqussutaat tunngavigalugu suliarineqarsimasut naapertorlugit suliarissappagu allannguiq sanasut suliaattut isumannaassuseqassaaq.

§ 17-imut

Aalajangersagaq nutaajuvoq, aammalu taarsigassarsisoq minnerpaamik inissiatiminik ikuallattornissamut anorersuarneranilu ajoqusernissamut sillimmasiinissaanik pisussaaffilerneqartartussanngorpoq, tamatumani taarsigassarsisoq inissiamik nutaamik imaluunniit inissiamik pioreersumik iluarsaassinissamut, pitsanngorsaannissamut alliliinissamulluunniit aningaasalersuinissamut taarsigassarsinersoq apeqqutaatinneqarani. Taamaalilluni taarsigassarsisup nammineerluni annertunerusumik atuuffilimmik sillimmasiissanerluni aalajangersinnaalerpaa.

Taarsigassarsisup minnerpaamik ikuallattoornissamut anorersuarneranilu ajoqusernissamut sillimmasiisussaananeramik piunasaqaateqarneq, taarsigassarsisup inissiamik qularnaveeqqusiussaqaarluni taarsigassarsinissamut allagartamik qulakkeerinissamut soqutigisaqarnissaa tunngavigineqarpoq. Ikuallattoornissamik anorersuarneranilu ajoqusernissamik oqarnermi sillimmasiissut, pigisap aalaakkaasup ikuallattoornissamut anorersuarneranilu ajoqusernissamut sillimmasiissutaasartooq nalinginnaasooq eqqarsaatigineqarpoq.

§ 18-imut

Aalajangersagaq nutaajuvoq.

Imm. 1-imut

Nutaatut imm. 1-imi Naalakkersuisut kommunalbestyrelsillu pisortanit taarsigassarsiarititat tamakkiisut 0,5 procentiinik sulinerlut akitsuummik akiliisitsisinnaanerannut inatsisitigut tunngavissamik ikkussisoqarpoq. Taamaalilluni inissiamik nutaamik aningaasalersuinissamut taarsigassarsinissamik qinnuteqaammik suliaqarnermi akitsuut 0,5 procentiusooq annerpaamik (2 x 283.500 kr.) = 2.835 koruuninik annertussuseqassaaq, kiisalu iluarsaassinissamut, pitsanngorsaannissamut alliliinissamullu taarsigassarsinissamik qinnuteqaammik

suliaqarnermi akitsuut 0,5 procentiusoq annerpaamik 283.500 koruunit = 1.417,50 koruuninik annertussuseqassalluni.

Suliarinninnermut akitsuutip annertussusissaanut pisortanit taarsigassarsiat inaarutaasut annertussusaat apeqqutaasassaaq, tunngaviusumillu suliap suliarineqarnerani aningaasartuutaasimasut sinnerlugit matussutissaassallutik.

Imm. 2-mut

Aalajangersakkami taarsigassarsisup piffissap qanoq ilinerani suliarinninnermut akitsuummik Naalackersuisunut kommunalbestyrelsimullu akiliinissaa taaneqarpoq.

§ 19-imut

Aalajangersagaq nutaajuvoq.

Imm. 1-imut

Imm. 1 Naalackersuisut kommunalbestyrelsillu qularnaveeqqusiussaqluni taarsigassarsinermi allagartap atsiorneqarneranut atatillugu akitsuummik 1.250 koruuninik annertussuseqartumik akiliisitsinnaanerannut inatsisitigut tunngavissamik imaqarpoq. Siunnersuummi § 8, imm. 1 naapertorlugu piginnittut nikinneranni akiitsulik allanngortarpoq, tamatumalu nassatarisaanik qularnaveeqqusiussaqluni taarsigassarsinnermut allagartamik pioreersumik sivitsuinnermut uppersaammik sanasoqartussaalluni. Akiitsullip sivitsuinnermut uppersaammik suliaqartoqarnissaa akisussaaffigaa. Sivitsuinnermut allagartami inissiap piginnittuata nikinnera, taamaalillunilu Naalackersuisunut kommunalbestyrelsimullu akiitsullip allanngornera allassimassaaq. Tassanissaaq taarsigassarsiallip taarsigassarsiaanik allanngortitsinnermut, kingornussassanik suliarinninnermut akileeqqusillunilu atsiornermut atatillugu qularnaveeqqusiussaqluni taarsigassarsinnermut allagartamik sivitsuinnermut uppersaammik suliaqartoqassaaq.

Imm. 2-mut

Imm. 2-p atuutilerneratigut Naalackersuisut kommunalbestyrelsillu tamarmik immikkut aningaaserivik ataaseq amerlanerusulluunniit qularnaveeqqusiussaqluni taarsigassarsinnermut allagartat, imm. 1-imi pineqartut atsiornissaannut, kiisalu akitsuummik 1.250 koruuniusumik, imm. 1-imi taaneqartumik akiliisitsinissamut piginnaatitsissummik tunisinnaavaat. Tamatumanili ersarippoq qularnaveeqqusiussaqluni taarsigassarsinnermut allagartap atsiornissaanut tunngaviusumik aalajangiisussaaq tassaammat taarsigassarsititsisoq, tassalu Naalackersuisut imaluunniit kommunalbestyrelsi. Tassalu inuup nammineerluni atsiornissaa kisimi aningaaserivimmit isumagineqassaaq.

§ 20-mut

Aalajangersagaq oqaasertaasigut erseqqissarneqarluni najoqqutassatigullu allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 10-mut assingusuvoq.

Imm. 1-imut

Imm. 1-imi Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 10, imm. 1-ip immikkoortuanut siullermut naleqqiullugu inissianik nutaanik aningaasalersuinissamut § 4, imm. 1 naapertorlugu taarsigassarsinissamik allakkatigut qinnuteqaatit ingerlaavartumik nassiunneqartarsinnaanerit erseqqissarneqarpoq. Inatsisitigut inissisimaneq atuuttoq allannguuteqartinneqarani ingerlaannarpoq. Maannamut taarsigassarsinissamik qinnuteqaatit allaganngorlugit tuniunneqartarput, kisiannili allaganngorlugit tunniunneqartarnissaannut piumasagaat maanna peqqussutip oqaasertaanut ilanngunneqarpoq.

Imm. 2-mut

Imm. 2 oqaasertamigut najoqqutassatigullu allannguuteqartinneqarluni § 10, imm. 1-ip immikkoortuanut 2-mut, kiisalu § 10 nr. 1-4-mut assingusuvoq. Taarsigassarsinissamik qinnuteqaammut piumasagaatit oqaasertaat allanngortinneqarput, taamaalillutik suleriaatsimut naleqquttunngortinneqarlutik. Suliassamut nassuiaat nalinginnaasumik tassaasinnaavoq, taarsigassarsisoq ingeniurimik atorfinitsitsisimappat taassuma suliaa. Aamma sanaartugassamut aningaasartuutissanut tamakkiisunut missingersuut qinnuteqaammut ilanngunneqassaaq. Aningaasartuutissat ukiunut agguarneqarnissaat piumasagaatigineqartarunnaarpoq. Taarsigassarsisup nalinginnaasumik sanasumit neqeroorut akuerisaq ilanngussinnaavaa, imaluunniit aningaasartuutissanut tamakkiisunut naatsorsuusiernerat taarsigassarsisup aningaaserivimmit attaveqarfignissaaneersaq ilanngussinnaallugu. Kiisalu taarsigassarsisoq nammineerluni uppersaasarsinnaavoq, aningaasartuutissanut tamakkiisunut nassuiaateqarfignissaminik. Taamatuttaaq taarsigassarsinissamik qinnuteqaammut nunaminertamik inniminniinnermut uppersaasarsisup imaluunniit kommunalbestyrelsiq nunaminertamik tunniussineranut uppersaasarsisup ilanngunneqassaaq, kiisalu nammineerluni aningaasalersuutissanik pissarsisinnaanerit uppersaasarsisup ilanngunneqassalluni. Nammineerluni aningaasalersuutissanut uppersaasarsisup amerlanertigut tassaasarsisup taarsigassarsinissamik qinnuteqartup aningaaserivianit uppersaasarsisup naatsaq, tassanilu taarsigassarsisup nammineq aningaasalersuutissaminik pissarsisinnaanissamut periarfissaqarnera allassimasarpoq, tak. § 4, imm. 4. Kiisalu qinnuteqaammut qinnuteqartup kinaaneranut ersarissaq ilanngunneqassaaq. Qinnuteqartoq inuinaappat qinnuteqartup cpr. normua qinnuteqaammut ilanngunneqassaaq, kiisalu qinnuteqartoq inatsisitigut pisinnaatitaasuuppat pisussaataitaasuuppallu qinnuteqartup GE-normua, SE-normua, CVR-normua imaluunniit kinaassutsimut uppersaasarsisup ersarissaq taakkununga assingusaq ilanngunneqassaaq.

Imm. 3-mut

Imm. 3 Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 10, imm. 2-imut najoqqutassatigut allannguuteqartinneqarluni assingusuvoq. Imm. 3-mi Naalackersuisut kommunalbestyrelsilu immikkoorlutik § 4 imm. 1 naapertorlugu taarsigassarsinissamik qinnuteqaatinut isummersinnaanerat aalajangersarneqarpoq. Taamaalilluni pisortanit taarsigassarsititsisartut immikkoorlutik taarsigassarsinissamik qinnuteqaatini sanaartornermut aningaasartuutit tapiiffigineqarsinnaatitaasut 20 procentiinik taarsigassarsititsinissaminnut tunngatillugu suliaqartalissapput. Qinnuteqaatit imminnut attuumassuteqanngitsumik suliarineqartassapput, taamaattumillu assersuutigalugu qinnuteqaat Naalackersuisunit itigartitsissutigineqarpat, tamanna taarsigassarsinissamik qinnuteqaatip kommunalbestyrelsimit suliarineqarneranut sunniuteqassanngilaq, aammalu paarlattuanik pisoqassalluni.

Naalackersuisut kommunalbestyrelsillu qinnuteqaammik suliarinninneranni suliaassamat nassuiaatit, suliaassanut aningaasartuutissanut tamakkiisunut missingersuutit, kiisalu qinnuteqartup nammineerluni aningaasaliissutiminik pissarsisinnaaneranut uppernarsaat immikkut ittumik pingaartinneqassapput.

§ 21-mut

Aalajangersagaq oqaasertaasigut erseqqissarneqarluni najoqqutassatigullu allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 11-mut assingusuvoq.

Imm. 1-imut

Imm. 1 Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 11, imm. 1-imut assingusuvoq. Inatsisitigut inissisimaneq atuuttoq allannguuteqartinneqarani ingerlaannassaaq. Maannamat taarsigassarsinissamik qinnuteqaatit allaganngorlugit tuniunneqartarput, kisiannili allaganngorlugit tunniunneqartarnissaannut piumasaqaat maanna peqqussutip oqaasertaanut ilanngunneqarpoq.

Nutaatut inissiamik pioreersumik alliliinissamat taarsigassarsinissamik qinnuteqartoqarsinnaalerpoq.

Imm. 2-mut

Imm. 2-mi taarsigassarsinissamik qinnuteqaammut suut ilanngunneqassanersut aalajangersarneqarpoq. Taarsigassarsinissamat qinnuteqaammut piumasaqaatit oqaasertaliornerat allanngortinneqarpoq, taamaalilluni suleriaatsimut naapertuuttunngortinneqarlutik. Taarsigassarsinissamik qinnuteqaammut iluarsaassinissamat, pitsanngorsaanissamat alliliinissamullu kissaatigisanut nassuiaatit ilanngunneqassapput. Nassuiaat tassaasinnaavoq taarsigassarsisoq ingeniurimik siunnersortaasumik atorfinitsitsisimappat taassuma nassuiaasiaa.

Nassuiaat aamma pappiaqqamut allanneqarsinnaavoq, tassanilu taarsigassarsisup soorlu pitsanngorsaaniissamut suliassatut kissaatigisani naatsumik nassuiassavai. Aamma suliassamut aningaasartuutissanut tamakkiisunut missingersuut ilanngunneqassaaq. Taasigassarsisup nalinginnaasumik sanasumit neqeroorut akuerisaq ilanngussinnaavaa, imaluunniit aningaasartuutissanut tamakkiisunut naatsorsuusiernerat taarsigassarsisup aningaaserivimmit attaveqarfigisaaneersoq ilanngussinnaallugu. Kiisalu taarsigassarsisoq nammineerluni uppernarsaasiorsinnaavoq, aningaasartuutissanut tamakkiisunut nassuiaateqarfigisaminik. Taamatuttaaq suliassamut pineqartumut nunaminertamik atugassiinissaq pisariaqartinneqarpat taarsigassarsinissamik qinnuteqaammut nunaminertamik inniminniinermut uppernarsaat imaluunniit kommunalbestyrelsip nunaminertamik tunniussineranut uppernarsaat ilanngunneqassaaq. Nalinginnaasumik illup qalliutaanik iluarsaassinermi nunaminertamik tunineqarnissaq piumasarineqartarpoq, taamatullu alliliinissamut nunaminertamik tunineqarnissaq piumasarineqartarluni. Tamatuma saniatigut qinnuteqaammut nammineerluni aningaasalersuutissanik pissarsisinnaanermut uppernarsaat ilanngunneqassaaq. Nammineerluni aningaasalersuutissanut uppernarsaat amerlanertigut tassaasarpog taarsigassarsinissamik qinnuteqartup aningaaserivianit uppernarsaat naatsoq, tassanilu taarsigassarsisup nammineq aningaasalersuutissaminik pissarsisinnaanissamut periarfissaqarnera allassimasarpog. Kiisalu qinnuteqaammut qinnuteqartup cpr. normua, qinnuteqartup kinaaneranut ersarissumik uppernarsaataasoq, kiisalu najugaqarneranut uppernarsaat, qinnuteqartup maannarpiag inissiami najugaqarneranut uppernarsaataasoq ilanngunneqassapput.

Imm. 3-mut

Imm. 3 Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 11, imm. 2-mut assingusuvoq, taamaalillunilu inatsisitigut inissisimaneq maannamut atuuttuusimasog ingerlateqqinneqarluni. Qinnuteqaatit suliarineqarnerini Naalakkersuisut suliassamut nassuiaatit, suliassanut aningaasartuutissanut tamakkiisunut missingersuutit, kiisalu qinnuteqartup nammineerluni aningaasaliissutiminik pissarsisinnaaneranut uppernarsaat immikkut ittumik pingaartittussaavaat.

§ 22-mut

Aalajangersakkami imm. 1 najoqqutassatigut allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 11a, imm. 1-imut assingusuvoq, kiisalu imm. 2 aamma 3 nutaajullutik.

Imm. 1-imut

Imm. 1-ip atuutilerneratigut Naalakkersuisut §§ 20 imaluunniit 21 naapertorlugu taarsigassarsinissamik qinnuteqaammut akuersippata, Naalakkersuisut taarsigassarsinissamik neriorsuutitut allakkiaq suliarylugu taarsigassarsisumut

nassiutissavaat. Kiisalu Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 11 a-mut naleqqiullugu, aammattaaq kommunalbestyrelsi § 20 naapertorlugu taarsigassarsinissamik qinnuteqaammut akuersippat, kommunalbestyrelsip taarsigassarsinissamik neriorsuutitut allakkiaq suliaralugu taarsigassarsisumut nassiutissavaa. Kommunalbestyrelsi § 11 a-jusimasumi taaneqanngikkaluartoq, aalajangersagaq malillugu aqutsinermi Naalakkersuisut kommunalbestyrelsilu tamarmik pineqarput. Peqqussutip allanngortinneratigut maanna periaaseq tamanna peqqussutip oqaasertaanut ilanngunneqarpoq.

Nutaatut maanna imm. 1-imi taarsigassarsinissamik neriorsuummi taarsigassarsiarititassat annertussuserigallagassaat allassimalerpoq.

Imm. 2-mut

Taarsigassarsiarititassat inaarutaasumik annertussusissaat aatsaat sanaartornermi naatsorsuutit inaarutaasut uppersarneqarsimasut pigineqalerpata naatsorsorneqarsinnaapput. Taarsigassarsisup inuup allap suliamut attuumassuteqanngitsup sanaartornermut naatsorsuutit inaarutaasunik suliaqarnissaa atsiuinissaalu akisussaaffigaa. Sanaartornermut naatsorsuutit taarsigassarsisup aningaasalersuinermi siunnersortaanit, kukkunersiuisuanit, sanaartortitsisutut siunnersuisuanit imaluunniit sanasumit, sanaartukkamik isumaginnittuusimasumit suliarineqarsinnaapput atsiorneqarsinnaallutillu.

Imm. 3-mut

Imm. 3-mi taarsigassarsiniarluni qinnuteqartup aningaasartuutissanut missingersuutaani, Naalakkersuisunit kommunalbestyrelsimillu taarsigassarsinissamik neriorsuuteqarnermut tunngaviusumi, aammalu sanaartornermi, iluarsaassinermi, pitsanngorsaanerme alliliinermiluunniit aningaasartuutit inaarutaasut tamakkiisut akornanni naapertuutinngitsoqarsinnaanera pineqarpoq. Taarsigassarsisoq pisariaqanngitsumik kinguarsaanertaqanngitsumik nikingassutaasoq pillugu taarsigassarsititsisumut nalunaaruteqassaaq. Taamaalilluni taarsigassarsisoq iliuuseqarnissamut pisussaaffilerneqarpoq, taannalu malillugu taarsigassarsisoq nalinginnaasumik aningaasartuutit missingersuusiomerisa aningaasartuutillu inaarutaasut tamakkiisut akornanni naapertuutinngitsoqarneranik paasisaqarnermi kingorna qaammat ataaseq qaangiutsinnagu taarsigassarsititsisumut nalunaaruteqartariaqarpoq.

§ 23-mut

Aalajangersagaq oqaasertamigut annikitsunik allannguuteqartinneqarluni Inatsisartut peqqussutaanni nr. 4-mi, 30. oktober 1998-imeersumi, kingusinnerusukkut allannguuteqartinneqartumi § 11a, imm. 2-5 assingaa.

Imm. 1-imut

Imm. 1-imi neriorsuutitut allakkiap atorineqarnissaa atorunnaarnissaaluunniit qulakkeerniarlugu ilanngunneqarpoq. Neriorsuutip suliarineqarnerani taarsigassarsinissamut aningaasaliissutissat Sanaartugassanut Iluarsagassanullu Aningaasaateqarfimmut nuunneqassapput. Suliap naammassinerani taarsigassarsiarititassat aningaasaateqarfimmiit akilerneqassapput. Suliaq naammassinngippat, taarsigassarsinissamut aningaasaliissutissat aningaasaateqarfimmiit utertinneqarlutik siunertanut allanut tullerriarneqarnissaat pingaaruteqarpoq.

Imm. 2-mut

Imm. 2-mi taarsigassarsisup taarsigassarsinermini suliassatut siunniussaminik aallartitsisimanera pillugu Naalakkersuisunut uppersaasussaataitanera pineqarpoq. Taarsigassarsisoq nammineerluni uppersaasiorsinnaavoq, kisiannili aamma taarsigassarsisup ingeniurimik siunnersortasumik atorfeqartitsisoqarsimappat taanna taamaalioqqullugu qinnuigisinnaavaa. Uppersaat suliassap aallartissimanerani aallartissimanninneranilluunniit paasisutissiisummik naatsumik imaqassaaq, tassanilu sanaartukkap sumut killissimanera sukumiisumik nassuarneqartariaqanngilaq.

Imm. 3-mut

Imm. 3 taarsigassarsisup atuilernissamut akuersissutip assilineranik Naalakkersuisunut nassiusissussaataitaneranut tunngasuvoq. Taarsigassarsisup nammineerluni akuersissutip assilineranik Naalakkersuisunut nassiusinnaavaa, kisiannili aamma taarsigassarsisup ingeniurimik siunnersortasumik atorfeqartitsisoqarsimappat taanna taamaalioqqullugu qinnuigisinnaavaa.

Imm. 4-mut

Imm. 4-p atuutilerneratigut Naalakkersuisut pisuni immikkut ittuni piffissamut killiliussatut imm. 1-mi taaneqartut uniorneqarnissaannut immikkut ittumik akuersissuteqarsinnaapput. Immikkut ittumik akuersissuteqarsinnaatitaanermi aalajangersakkat pingaartumik sanaartornerup aallartilluaruttornerani kiisalu atuilernissamut akuersissummik tunineqarnissap kisimi utaqqineqarnerani atorfeqartussatut eqqarsaatigineqarpoq. Aalajangersakkami tamatumani eqqarsaatigineqartoq pingaarneq tassaavoq, aningaasat Sanaartugassanut Iluarsagassanullu Aningaasaateqarfimmut nuunneqarsimasut atorneqarnissaasa qulakkeerneqarnissaa, taamaalilluni sanaartugaq piffissamut pilersaarut uniorpallaarnagu sananeqarsinnaassalluni.

§ 24-mut

Aalajangersagaq atuutilerfissamut aalajangersagaavoq. Tamatumunnga peqatigitillugu Inatsisartut peqqussutaat nr. 4, 30. oktober 1998-imeersoq, Inatsisartut peqqussutaatigut nr. 1-ikkut, 21. maj 2002-meersukkut

allannguuteqartinneqartoq, kingullermillu Inatsisartut peqqussutaatigut nr. 5-ikkut, 15. april 2003-meersukkut allannguuteqartinneqartoq atorunnaassaaq.

§ 25-mut

Aalajangersagaq ikaarsaanermut aalajangersagaavoq. Taarsigassarsinissamut neriorsuutit peqqussutip atuutlernissaa sioqqullugu tunniunneqarsimasut aningaasartamikkut allannguiffigineqassanngillat, akermanilli siunnersuummi aalajangersakkat sinneri ullup atuutilerfiusup kingorna taarsigassarsititsinissamut neriorsuutitut taakkununga atuutissallutik. Qinnuteqaatit peqqussutip atuutilerfissaanut piffissaliussap iluani nassiunneqarsimasut, kisiannili ullormi atuutsilerfiusumi taarsigassarsinissamik neriorsuuteqarfiusimanngitsut peqqussummi aningaasanut killissarititaasut pillugit aalajangersakkat naapertorlugit taarsigassarsinissamik neriorsuuteqarfiusapput, tak. siunnersuummi §§ 4 aamma 10.